



卷之六

一

二

三

四

五

六

七

八

九

十



白香山詩後集卷第十六

律詩

凡一百首

病中詩

并序

開成己未歲余蒲柳之年六十有八冬十月甲寅旦始得風痺之疾體癯目眩左足不支蓋老病相乘時而至耳余早棲心釋梵浪迹老莊因疾觀身果有所得何則外形骸而內忘憂恚先禪觀而後順醫治旬月以還厥疾少間杜門高枕澹然安閒吟諷興來亦不能遏因成十五首題爲病中詩且貽所知兼用自廣昔劉公幹病漳浦謝康樂臥臨川咸有篇章抒詠其志今引而序之者慮不知我者或加誚焉

初病風





四  
六十八衰翁乘衰百病攻朽株難免蠹空穴易來風肘  
痺宜生柳頭旋劇轉蓬恬然不動處虛自在曾中

枕上作

風疾侵凌臨老頭血凝筋滯不調柔甘從此後支離臥  
賴是從前爛熳遊迴思往事紛如夢轉覺餘生昏若浮  
浩氣自能充靜室驚廳何必蕩虛舟腹空先進松花酒  
膝冷重裝桂布裘若問樂天憂病否樂天知命了無憂

荅閒上人來問因何風疾

一牀方丈向陽開勞動文殊問疾來欲界凡夫何足道

四禪天始免風災

色界四天初禪具三災二禪無  
火災三禪無水災四禪無風災

病中五絕句

世間生老病相隨此事心中久自知今日行年將七十

猶須慙媿病來遲

方寸成灰鬢作絲假如強健亦何為家無憂累身無事

正是安閒好病時

李君墓上松應拱元相池頭竹盡枯多幸樂天今始病

不知合要苦治無

李元昔子執友也杓直少予八歲即世已九年微  
之少予七年薨已八年矣今予始病得非幸乎

目昏思寢即安眠足軟妨行便坐禪身作醫王心是藥

不勞和扁到門前

交親不要苦相憂亦擬時時強出遊但有心情何用脚

陸乘肩輿水乘舟

送嵩客

登山臨水分無期泉石煙霞今屬誰君到嵩陽吟此句  
與教三十六峰知



罷灸

病身佛說將何喻變滅須臾豈不聞莫遣淨名知我笑  
休將火艾灸浮雲維摩經云是身如浮雲須臾變滅也

賣駱馬

五年花下醉騎行臨賣回頭嘶一聲項籍顧騅猶解歎  
樂天別駱豈無情

別柳枝

兩枝楊柳小樓中嫋娜多年伴醉翁明日放歸歸去後  
世間應不要春風

立名按信淵奎律髓樂天為病風痺遣二妾故有是作觴詠罷來賓閣閉笙歌散後妓房空亦病中所賦又明年有去歲樓中別柳枝自註云樊蠻也二妓者皆以柳枝目之云

就暖偶酌戲諸詩酒舊侶

低屏軟褥臥藤牀昇向前軒就日陽一足任他為外物  
三杯自要沃中腸頭風若見詩應愈齒折仍誇笑不妨  
細酌徐吟猶得在舊遊未必便相忘

歲暮呈思黯相公皇甫朗之及夢得尚書

歲暮幡然一老夫十分流輩九分無莫嫌身病人扶持  
猶勝無身可遣扶

自解

房傳往世為禪客世傳房太尉前生為禪僧與婁師德友善慕其為人故今生有婁之遺風也王道前生

應畫師王右丞詩云宿世是詞客前身應畫師我亦定中觀宿命多生債負是歌

詩不然何故狂吟詠病後多於未病時已上病中十五首

歲暮病懷兼贈夢得時與夢得同患足疾

十年四海故交親零落唯殘兩病身共遣數奇從是命



同教步蹇有何因  
眼隨老減嫌長夜  
體待陽舒望早春  
新樂堂前舊池上  
相隨亦不要他人

雪後過集賢裴令公舊宅有感

梁王捐館後  
枚叟過門時  
有淚人還泣  
無情雪不知  
臺亭畱盡在  
賓客散何之  
唯有蕭條雁  
時來下故池

酬夢得貧居詠懷見贈

歲陰生計兩蹉跎  
相顧悠悠醉且歌  
廚冷難畱鳥止屋  
詩云瞻鳥及止于誰之屋言鳥多止富家之屋也

門閑可與雀張羅  
病添莊舄吟聲苦  
貧欠韓康藥債多  
日望揮金賀新命

又如何

時夢得罷賓客除秘監祿俸略同故云

酬夢得見喜疾瘳

暖臥摩綿褥  
晨一作寒傾藥酒螺  
昏昏布裘底  
病醉睡相和

末疾徒云爾  
傳云風淫末疾末謂四肢  
餘年有幾何  
須知差與否  
相去校無多

夜聞箏中彈瀟湘送神曲感舊

縹緲巫山女  
歸來七八年  
殷勤湘水曲  
畱在十三絃  
苦調吟還出  
深情咽不傳  
萬重雲水思  
今夜月明前

感蘇州舊舫

畫梁朽折紅窗破  
獨立池邊盡日看  
守得蘇州船舫爛  
此身爭合不衰殘

感舊石上字

閑撥船行尋舊池  
幽情往事復誰知  
太湖石上鐫三字  
十五年前陳結之

立名按容齋五筆云初讀樂天感石上舊字詩有陳結之並無所經見全不可曉後觀其對酒有感寄李郎中詩往年江外拋桃葉去歲樓中別柳枝注云桃葉結之也



柳枝樊素也然  
後結之義始明

見敏中初到邠寧秋日登城樓詩詩中頗多鄉

思因以寄和

從殿中侍御  
史出副邠寧

想爾到邊頭蕭條正值秋二年貧御史八月古邠州絲  
管聞雖樂風沙見亦愁望鄉心若苦不用數登樓

齋戒

每因齋戒斷葷腥漸覺塵勞染愛輕六賊定知無氣色  
三尸應恨少恩情酒魔降伏終須盡詩債填還亦欲平  
從此始堪為弟子竺乾師是古先生

戲禮經老僧

香火一爐燈一盞白頭夜禮佛名經何年飲著聲聞酒  
直到如今醉未醒

近見慕巢尚書詩中屢有歎老思退之意又於  
洛下新置郊居然寵寄方深歸心大速因以長

句戲而諭之

近見詩中歎白鬚遙知聞外憶東都煙霞偷眼窺來久  
富貴粘身擺得無新置林園猶漢落未終婚嫁且踟躕  
應須待到懸車歲然後東歸伴老夫

對鏡偶吟贈張道士抱元

閒來對鏡自思量年貌衰殘分所當白髮萬莖何所怪  
丹砂一粒不曾嘗眼昏久被書料理肺渴多因酒損傷  
今日逢師雖已晚枕中治老有何方

病入新正

枕上驚新歲花開念舊歡是身老所逼非意病相干風



月情猶在杯觴興漸闌便休心未伏更試一春看

臥疾來早晚

臥疾來早晚懸懸將十旬婢能尋本草犬不吠醫人酒  
甕全生醖歌筵半委塵風光還欲好爭向枕前春

強起迎春戲寄思黯

杖策人扶廢病身晴和強起一迎春他時蹇跛縱行得  
笑殺平原樓上人

夢得前所酬篇有鍊盡美少年之句因思往事  
兼詠今懷重以長句荅之

鍊盡少年成白首憶初相識到今朝昔饒春桂長先折  
今伴寒松取後凋昔登科第夢得多居先  
今同暮年洛下為老伴生事縱貧猶可過風  
情雖老未全銷聲華寵命人皆得若箇如君歷七朝夢得

貞元中及今  
凡仕七朝也

病後寒食

故紗絳帳舊青氈藥酒醺醺引醉眠斗擻敝袍春晚後  
摩挲病脚日陽前行無筋力尋山水坐少精神聽管絃  
拋却風光負寒食曾來未省似今年

老病相仍以詩自解

榮枯憂喜與彭殤都似人間戲一場蟲臂鼠肝猶不怪  
雞膚鶴髮復何傷昨因風發甘長往今遇陽和又小康  
春暖來風  
痺稍退也還似遠行裝束了遲迴且住亦何妨

皇甫郎中親家翁赴任絳州宴送出城贈別

慕賢入室交先定結援通家好復成新婦不嫌貧活計  
嬌孫同慰老心情洛橋歌酒今朝散絳路風煙幾日行



欲識離羣相戀意爲君扶病出都城

春暖

風痺宜和暖春來脚校輕鶯留花下立鶴引水邊行髮  
少嫌巾重顏衰訝鏡明不論親與故自亦昧平生

殘春晚起伴客笑談

掩户下簾朝睡足一聲黃鳥報殘春披衣岸幘日高起  
兩角青衣扶老身策杖強行過里巷引杯閒酌伴親賓  
莫嫌病後妨談笑猶恐多於不病人

送唐州崔使君侍親赴任

連持使節歷專城獨賀崔君最慶榮烏府一拋霜簡去  
朱輪四從板輿行崔郎中從殿中連典四郡皆侍親赴任發時止許沙鷗送到日  
方乘竹馬迎唯慮郡齋賓友少數杯春酒共誰傾

春晚詠懷贈皇甫朗之

豔陽時節又蹉跎遲暮光陰復若何一歲中分春日少  
百年通計老時多多中更被愁牽引少裏一作處兼遭病折  
磨賴有銷憂治悶藥君家醲耐我狂歌

春盡日宴罷感事獨吟開成五年三月三十日作

五年三月今朝盡客散筵空獨掩扉病共樂天相伴住  
春隨樊素一時歸閒聽鶯語移時立思逐楊花觸處飛  
金帶縫腰衫委地年年衰瘦不勝衣

病中辱崔宣城長句見寄兼有魍魎之贈因以  
四韻總而酬之

劉楨病發經春臥謝朓詩來盡日吟三道舊誇收片玉

昔子考制策崔君登科也一章新喜獲雙金信題霞綺絨情重酒試銀觥



表分深科第門生滿霄漢歲寒少得似君心

前有別柳枝絕句夢得繼和云春盡絮飛留不  
得隨風好去落誰家又復戲答

柳老春深日又斜任他飛向別人家誰能更學孩童戲  
尋逐春風捉柳花

池上早夏

水積春塘晚陰交夏木繁舟船如野渡籬落似江邨靜  
拂藤牀席香開酒庫門慵閒無一事時弄小嬌孫

談氏外孫生三日喜是男偶吟成篇兼戲呈夢  
得

玉芽珠顆小男兒羅薦蘭湯浴罷時  
芙蓉春來盈女手  
梧桐老去長孫枝慶傳媒氏燕先賀喜報談家鳥預知

明日貧翁具雞黍應須酬賽引雛詩

前年談氏外孫女初生夢得有  
賀詩云從此引雛今幸是男

前言似有  
微故云

開成大行皇帝輓歌詞四首奉敕撰進

御宇恢皇化傳家叶至公華夷臣妾內堯舜弟兄中制  
度移民俗文章變國風開成與貞觀實錄事多同

晏駕辭雙闕靈儀出九衢上雲歸碧落下席葬蒼梧  
莫晚餘堯曆龜新啓夏圖三朝連棣萼從古帝王無

嚴恭七月禮哀慟萬人心地感勝秋氣天愁結夕陰鼎  
湖龍漸遠濛汜日初沈唯有雲韶樂長畱治世音

化成同軌表清平恩結連枝感聖明帝與九齡雖吉夢  
山呼萬歲是虛聲月低儀仗辭蘭路風引笳簫入柏城

老病龍顏攀不及東周退傅最傷情



時熱少見客因詠所懷

冠櫛心多嬾逢迎興漸微況當時熱甚幸遇客來稀濕  
灑池邊地涼開竹下扉露牀青篔簹風架白蕉衣院靜  
留僧宿樓空放妓歸衰殘強歡宴此事久知非

宣州崔大夫閣老忽以近詩數十首見示吟諷  
之下竊有所喜因成長句寄題郡齋

謝玄暉歿吟聲寢郡閣寥寥筆研閒無復新詩題壁上  
虛教遠岫列窗間

謝宣城郡內詩  
云窗中列遠岫

忽驚歌雪今朝至必恐文  
星昨夜還再喜宣城章句動飛觴遙賀敬亭山

謝又有題敬  
亭山詩並見

文選  
中

足疾

足疾無加亦不瘳縣春歷夏復經秋開顏且酌尊中酒

代步多乘池上舟幸有眼前衣食在兼無身後子孫憂  
應須學取陶彭澤但委心形任去留

晚池汎舟遇景成詠贈呂處士

岸淺橋平池面寬飄然輕棹汎澄瀾風宜扇引開懷入  
樹愛舟行仰臥看別境客稀知不易能詩人少詠應難  
惟憐呂叟時相伴同把磻溪舊釣竿

夢微之

夜來攜手夢同遊晨起盈巾淚莫收漳浦老身三度病  
咸陽宿草八回秋君埋泉下泥銷骨我寄人間雪滿頭  
阿衛韓郎相次去夜臺茫昧得知不

阿衛微之小男  
韓郎微之愛婿

感秋詠意

炎涼遷次速如飛又脫生衣著熟衣繞壁暗蛩無限思



戀巢寒燕未能歸須知流輩年年失莫歎衰容日日非  
舊語相傳聊自慰世間七十老人稀

老病幽獨偶吟所懷

眼漸昏昏耳漸聾滿頭霜雪半身風已將心出浮雲外  
維摩經云是身如浮雲也猶寄形於逆旅中觴詠罷來賓閣閉笙歌散後  
妓房空世緣俗念消除盡別是人間清淨翁

和楊尚書罷相後夏日遊永安水亭兼招本曹

楊侍郎同行

道行無喜退無憂舒卷如雲得自由良冶動時爲哲匠  
巨川濟了作虛舟竹亭陰合偏宜夏水檻風涼不待秋  
遙愛翩翩雙紫鳳入同官署出同遊

在家出家

衣食支分婚嫁畢從今家事不相仍夜眠身是投林鳥  
朝飯心同乞食僧清啖數聲松下鶴寒光一點竹間燈  
中宵入定跏趺坐女喚妻呼都不應

夜涼

露白風清庭戶涼老人先著夾衣裳舞腰歌袖拋何處  
唯對無絃琴一張

繼之尚書自余病來寄遺非一又蒙覽醉吟先  
生傳題詩以美之今以此篇用伸酬謝

衰殘與世日相疎惠好唯君分有餘茶藥贈多因病久  
衣裳寄早及寒初所寄贈之物皆及時交情鄭重金相似詩韻清鏘  
玉不如醉傅狂言人盡笑獨知我者是尚書

五年秋病後獨宿香山寺三絕句



經年不到龍門寺今夜何人知我情還向暢師房裏宿  
新秋月色舊灘聲

飲徒歌伴今何在雨散雲飛盡不迴從此香山風月夜  
祇應長是一身來

石盆泉畔石樓頭十二年來晝夜遊更過今年年七十  
假如無病亦宜休

題香山新經堂招僧

煙滿秋堂月滿庭香花漠漠磬泠泠誰能來此尋真諦  
白老新開一藏經

偶題鄧公

公即給事中珽之子也  
飢窮老病退居此邨

偶因攜酒尋邨客聊復迴車訪薜蘿且值雪寒相慰問  
不妨春暖更經過翁居山下年空老我得人間事校多

一種共翁頭似雪翁無衣食又如何

早入皇城贈王畱守僕射

津橋殘月曉沈沈風露淒清禁署深城柳宮槐謾搖落  
悲愁不到貴人心

寄題廬山舊草堂兼呈二林寺道侶

三十年前草堂主而今雖在鬢如絲登山尋水應無力  
不似江州司馬時漸伏酒魔休放醉猶殘口業未拋詩  
君行過到鑪峰下爲報東林長老知

此詩憑談知進侍  
御往題草堂中也

改業

先生老去飲無興居士病來閒有餘猶覺醉吟多放逸  
不如禪坐更清虛

予先有醉吟先生傳今故云

柘枝紫袖教丸藥羯鼓蒼

頭遣種蔬却被山僧戲相問一時改業意何如



山下畱別佛光和尚  
勞師送我下山行此別何人識此情我已七旬師九十  
當知後會在他生

山中五絕句

遊嵩陽見五物各有所感感與不同隨興而吟因成五絕

嶺上雲

嶺上白雲朝未散田中青麥旱將枯自生自滅成何事  
能逐東風作雨無

石上苔

漠漠斑斑石上苔幽芳靜綠絕纖埃路傍凡草榮遭遇  
曾得七香車輾來

林下樗

香檀文桂苦雕鐫生理何曾得自全知我無材老樗否

一枝不損盡天年

澗中魚

海水桑田欲變時風濤翻覆沸天池鯨吞蛟鬪波成血  
深澗游魚樂不知

洞中蝙蝠

千年鼠化白蝙蝠黑洞深藏避網羅遠害全身誠得計  
一生幽暗又如何

自戲三絕句

閒臥獨吟無人酬和聊假身心相戲往復偶成三章

心問身

心問身云何泰然嚴冬暖被日高眠放君悞活知恩否  
不早朝來十一年

身報心



三子五七  
白香山言後集卷十六  
心是身王身是宮君今居在我宮中是君家舍君須愛  
何事論恩自說功

心重荅身

因我疎慵休罷早遣君安樂歲時多世間老苦人何限  
不放君閑柰我何

立名按齊東野語陶靖節作形影相贈神釋之詩謂貴賤賢愚莫不營營惜生故極陳形影之苦而以神辨自然以釋其惑樂天因之作心問身身荅心詩坡翁又從而賦六言曰淵明形神自我樂天身心於物而今月下三人他日當成幾佛

會昌元年春五絕句

病後喜過劉家

忽憶前年初病後此生甘分不銜杯誰能料得今春事  
又向劉家飲酒來

贈舉之僕射

今春與僕射三為寒食之會

雞球錫粥屢開筵談笑謳吟間管絃一月三回寒食會  
春光應不負今年

盧尹賀夢得會中作

病聞川守賀筵開起伴尚書飲一杯任意少年長笑我  
老人自覓老人來

題朗之槐亭

春風可惜無多日家醞唯殘軟半瓶猶望君歸同一醉  
籃舁早晚入槐亭

勸夢得酒

誰人功畫麒麟閣何客新投魑魅鄉兩處榮枯君莫問  
殘春更醉兩三場

過裴令公宅二絕句

裴令公在日常同聽楊柳枝歌每遇雪天無非招宴二物如故因成感情



風吹楊柳出牆枝憶得同歡共醉時每到集賢坊北過  
不曾一度不低眉

梁王舊館雪濛濛愁殺鄒枚二老翁此句兼屬夢得假使明朝深  
一尺亦無人到兔園中

百日假滿少傅官停自喜言懷

長告今朝滿十旬從茲蕭灑便終身老嫌手重拋牙笏  
病喜頭輕換角巾疏傅不朝懸組綬尚平無累畢婚姻  
人言世事何時了我是人間事了人

早熱

畏景又加旱火雲殊未收籬暄飢有雀池涸渴無鷗岸  
憤頭仍痛褰裳汗亦流若為當此日遷客向炎州時楊李

韶

題崔少尹上林坊新居

坊靜居新深且幽忽疑縮地到滄洲宅東籬缺嵩峰出  
堂後池一作門開洛水流高下三層盤野徑沿洄十里泛漁  
舟若能為客烹雞黍願伴田蘇日日遊

新澗亭

煙蘿初合澗新開閒上西亭日幾回老病歸山應未得  
且移泉石就身來

對酒有懷寄李十九郎中

往年江外拋桃葉結之也去歲樓中別柳枝樊蠻也寂莫春來一

杯酒此情唯有李君知吟君舊句情難忘風月何時是

盡時李君嘗有悼故妓詩云直應人世無風月恰是心中忘却時今故云

楊六尚書頻寄新詩詩中多有思閑相就之志



因書鄙意報而諭之

君年殊未及懸車未合將閒逐老夫身健正宜金印綬  
位高方稱白髭鬚若論塵事何由了但問雲心自在無  
進退是非俱是夢丘中闕下亦何殊

偶吟自慰兼呈夢得

予與夢得甲子同今俱七十

且喜同年滿七旬莫嫌衰病莫嫌貧已為海內有名客  
又占世間長命人耳裏聲聞新將相眼前失盡故交親  
尊榮富壽難兼得閒坐思量最要身

寄潮州楊繼之

相府潮陽俱夢中夢中何者是窮通他時事過方應悟  
不獨榮空辱亦空

雪暮偶與夢得同致仕裴賓客王尚書飲

黃昏慘慘雪霏霏白首相歡醉不歸四箇老人三百歲

裴年九十餘王八十餘子與夢得俱七十合三百餘歲可謂希有之會也

人間此會亦應稀

雪朝乘興欲詣李司徒畱守先以五韻戲之

夜寒生酒思曉雪引詩情熱飲一兩盞冷吟三五聲鋪  
花連地凍銷玉畏天晴好拂烏巾出宜披鶴氅行梁園  
應有興何不召鄒生

贈思黯

前以履道新小灘詩寄思黯報章云請向歸仁砌下看思黯歸仁宅亦有小灘

為憐清淺愛潺湲一日三回到水邊若道歸仁灘更好  
主人何故別三年

聽歌六絕句

聽都子歌

詞云試問常娥更要無

都子新歌有性靈一聲格轉已堪聽更聽唱到常娥字



猶有樊家舊典刑

樂世一名六么

管急絃一作絲 絲拍漸稠 綠腰宛轉 曲終頭誠 知樂世聲聲 樂老病人聽未免愁

水調第五編乃五言 調調韻最切

五言一遍最殷勤 調少情多似有因 不會當時翻曲意 此聲腸斷為何人

想夫憐王維右丞詞云秦州半夕陽開此句尤佳

玉管朱絃莫急催 容聽歌送十分杯 長愛夫憐第二句 請君重唱夕陽開

何滿子開元中滄州有歌者何滿子臨刑進此曲以贖死上竟不免

世傳滿子是人名 臨就刑時曲始成 一曲四調一作詞 歌八

疊從頭便是斷腸聲

離別難

綠楊陌上送行人 馬去車迴一望塵 不覺別時紅淚盡 歸來無淚可可統反 霑巾

閒樂

坐安臥穩輿平肩 倚杖披衫繞四邊 空腹三杯卯後酒 曲肱一覺醉中眠 更無忙苦吟閒樂 恐是人間自在天

白香山詩後集卷第十六



白香山詩後集卷第十七

律詩 凡一百  
八首

春池閒汎

綠塘新水平紅檻小舟輕解纜隨風去開襟信意行淺  
 憐清演漾深愛綠澄泓白撲柳飛絮紅浮桃落英古文  
 科斗出新葉剪刀生樹集鶯朋友雲行鴈弟兄飛沈皆  
 適性酣飲自怡情花助銀杯氣松添玉軫聲魚跳何事  
 樂鷗起復誰驚莫唱滄浪曲無塵可濯纓

池上寓興二絕

濠梁莊惠謾相爭未必人情知物情獺捕魚來魚躍出  
 此非魚樂是魚驚

水淺魚稀白鷺飢勞心瞪目待魚時外容閒暇中心苦



似是非誰得知  
宴後題府中水堂贈盧尹中丞

昔余為尹日創造之

水齋歲久漸荒蕪自媿甘棠無一株新酒客來方宴飲

舊堂主在重歡娛莫言楊柳枝空老府妓有歌楊柳枝曲者因以名焉直致

櫻桃樹已枯府西有櫻桃廳因樹為名今樹亦枯也從我到君十一尹相看自置

府中無自予罷後至中丞凡十一尹也

和敏中洛下即事時敏中為殿中分司

昨日池塘春草生阿連新有好詩成花園到處鶯呼入

駿馬遊時客避行水暖魚多似南國人稀塵少勝西京

洛中佳境應無限若欲諳知問老兄

送敏中新授戶部員外郎西歸

千里歸程三伏天官新身健馬翩翩行衝赤日加餐飯

上到青雲穩著鞭長慶老郎唯我在客曹故事望君傳

前鴻後鴈行難續相去迢迢二十年長慶初予為主客郎中知制誥遷中書舍人去今二十一年也

立名按唐書武宗聞居易名欲相之以問李德裕德裕言居易病廢敏中文類其兄有器識即除翰林學士時方為庫部郎中未逾三年入相

南侍御以石相贈助成水聲因以絕句謝之

泉石粼粼聲似琴閒眠靜聽洗塵心莫輕兩片青苔石

一夜潺湲直萬金

閒居自題戲招宿客

水畔竹林邊閒居二十年健常攜酒出病即掩門眠解

綬收朝佩褰裳出野船屏除身外物擺落世間緣報曙

窗何早知秋簟最先微風深樹裏斜日小樓前渠口添

新石籬根寫亂泉欲招同宿客誰解愛潺湲西亭牆下泉石有聲



李畱守相公見過池上泛舟舉酒話及翰林舊事因成四韻以獻之

引棹尋池岸移尊就菊叢何言濟川後相訪釣船中白首故情在青雲往事空同時六學士五相一漁翁

立名按紀事李絳時分司東都五相指絳與裴度崔羣裴均王播一漁翁公自謂也容齋隨筆云此詩紀元和二年至六年事予以其時考之所謂五相者裴均王涯杜元穎崔羣及絳也

閏九月九日獨飲

黃花叢畔綠尊前猶有些些舊管絃偶遇閏秋重九日東籬獨酌一陶然自從九月持齋戒不醉重陽十五年覽盧子蒙侍御舊詩多與微之唱和感今傷昔因贈子蒙題於卷後  
早聞元九詠君詩恨與盧君相識遲今日逢君開舊卷

卷中多道贈微之相看掩淚情難說別有傷心事豈知聞道咸陽墳上樹已抽三丈白楊枝

北夢瑣言云白太仔與元相國友善以詩道著名時號元白其集內有哭元相詩云相看掩淚俱無語等句洎自撰墓志云與劉夢得為詩友殊不言元公人疑其隙終也立名按此語在醉吟先生傳中非墓志也傳末曰於時開成三年先生之齒六十有七則是微之歿久矣其所謂如滿為空門友韋楚為山水友夢得為詩友皇甫朗之為酒友皆就當時在洛之人而言非該舉平生也且公晚年哭微之作甚多有夢微之詩云夜來攜手夢同游晨起盈巾淚莫收又聞歌者唱微之詩云時向歌中聞一句未容傾耳已傷心感悼悽愴如在初沒隙終之語豈不大謬邪又考史傳皆作白少傅即公詩內止有少傅官停語並無稱太保者不知何所本也

寒亭畱客

今朝閒坐石亭中爐火銷殘尊又空冷落若為畱客住  
冰池霜竹雪顚翁

新小灘

石淺沙平流水寒水邊斜插一漁竿江南客見生鄉思  
道似嚴陵七里灘



和李中丞與李給事山居雪夜同宿小酌

憲府觸邪峨豸角，瑣闥駁正犯龍鱗。二人當官盛事為時所稱也那知近地齋居客，忽作深山同宿人。一盞寒燈雲外夜，數杯溫酎雪中春。林泉莫作多時計，諫獵登封憶舊臣。

履道西門二首

履道西門有敝居，池塘竹樹繞吾廬。豪華肥壯雖無分，飽暖安閒即有餘。行竈朝香炊早飯，小園春暖撥新蔬。夷齊黃綺誇芝蕨，比我盤餐恐不如。

履道西門獨掩扉，官休病退客來稀。亦知軒冕榮堪戀，其柰田園老合歸。跛鼈難隨騏驥足，傷禽莫趁鳳皇飛。世間認得身人少，今我雖愚亦庶幾。

偶吟

人生變改故無窮，昔是朝官今野翁。久寄形於朱紫內，漸抽身入蕙荷中。荷衣蕙帶皆楚詞也無情水任方圓器，不繫舟隨去住風。猶有鱸魚蓴菜興，來春或擬往江東。

雪夜小飲贈夢得

同為懶慢園林客，共對蕭條雨雪天。小酌酒巡銷永夜，大開口笑送殘年。久將時背成遺老，多被人呼作散仙。呼作散仙應有以，曾看東海變桑田。

歲暮夜長病中燈下聞盧尹夜宴以詩戲之且為來日張本也

榮鬧興多嫌晝短，衰閒睡少覺明遲。當君秉燭銜杯夜，是我停殮一作燈服藥時。枕上愁吟堪發病，府中歡笑勝尋醫。明朝強出須謀樂，不擬車公更詭誰。



病中數會張道士見譏以此荅之

亦知數出妨將息不可端居守寂寥病即藥窗眠盡日  
興來酒席坐通宵賢人易狎須勤飲姹女難禁莫漫燒  
張道士輸白道士一杯沆瀣便逍遙

卯飲

短屏風掩臥牀頭烏帽青氈白氎裘卯飲一杯眠一覺  
世間何事不悠悠

寄題餘杭郡樓兼呈裴使君

官歷二十政宦遊三十秋江山與風月最憶是杭州北  
郭沙堤尾西湖石岸頭綠觴春送客紅燭夜迴舟不敢  
言遺愛空知念舊遊憑君吟此句題向望濤樓

楊六尚書畱太湖石在洛下借置庭中因對舉

杯寄贈絕句

借君片石意何如置向庭中慰索居每就玉山傾一酌  
興來如對醉尚書

喜入新年自詠

時年七十一

白鬚如雪五朝臣又值新正第七旬老過占他藍尾酒  
病餘收得到頭身銷磨歲月成高位比類時流是幸人  
大曆年中騎竹馬幾人得見會昌春

灘聲

碧玉斑斑沙歷歷清流浹浹響泠泠自從造得灘聲後  
玉管朱絃可要聽

題石泉

殷勤傍石繞泉行不說何人知我情漸恐耳韻兼眼暗



聽泉看石不分明

送王卿使君赴任蘇州因思花迎新使感舊游

寄題郡中木蘭西院

一別蘇州十八載時光人事隨年改不論竹馬盡成人亦恐桑田半為海鶯入故宮含意思花迎新使生光彩為報江山風月知至今白使君猶在

出齋日喜皇甫十早訪

三旬齋滿欲銜杯平日敲門門未開除却朗之攜一榼的應不是別人來

會昌二年春題池西小樓

花邊春水水邊樓一坐經今四十秋望月橋傾三遍換采蓮船破五回修園林一半成喬木鄰里三分作白頭

蘇李冥蒙隨燭滅陳樊漂泊逐萍流

蘇庶子弘李中丞道樞及陳樊二妓十餘年皆樓中歌酒

中伴或歿或散獨予在焉

雖貧眼下無妨樂縱病心中不與愁自笑靈光歸然在春來遊得且須遊

酬南洛陽早春見贈

物華春意尚遲迴賴有東風晝夜催寒繖柳腰收未得暖熏花口噤初開古詩云口噤不能開欲披雲霧聯襟去先喜瓊琚入袖來久病長齋詩老退爭禁年少洛陽才

對新家醞翫自種花

香麴親看造芳叢手自栽迎春報酒熟垂老看花開紅蠟半含萼綠油新醞醅玲瓏五六樹激灩兩三杯恐有狂風起愁無好客來獨酣還獨語待取月明回

攜酒往朗之莊居同飲



慵中又少經過處別後都無勸酒人不挈一壺相就醉  
若為將老度殘春

以詩代書酬慕巢尚書見寄慕巢書中頗切歸休  
結侶之意故以此答

書意詩情不偶然若云夢想在林泉願為愚谷煙霞侶  
思結空門香火緣無媿尚書情眷眷自憐居士病緜緜  
不知待得心期否老校於君六七年

春盡日

芳景銷殘暑氣生感時思事坐含情無人開口其誰語  
有酒回頭還自傾醉對數叢紅芍藥渴嘗一盃綠昌明  
蜀茶之名也春歸似遣鶯留語好住林園三兩聲

招山僧

能入城中乞食否莫辭塵土污袈裟欲知住處東城下

繞竹泉聲是白家

夏日與閒禪師林下避暑

落景牆西塵土紅伴僧閒坐竹泉東綠蘿潭上不見日  
白石灘邊長有風熱惱漸知隨念盡清涼常願與人同  
每因毒暑悲親故多在炎方瘴海中是歲潮韶等郡  
皆有親友謫居

立名按稽古錄開成五年楊  
嗣復貶潮州李珣貶韶州

題新澗亭兼酬寄朝中親故見贈

何處披襟風快哉一亭臨澗四門開金章紫綬辭腰去  
白石清泉就眼來自得所宜還獨樂各行其志莫相咍  
禽魚出得池籠後縱有人呼可更回

病中看經贈諸道侶

右眼昏花左足風金篦石水用無功金篦刮眼病見涅槃經  
磁石水治風見外臺方不



如迴念三乘樂便得浮生百疾空無子同居草菴下見法華經

時適談氏女子自太原初歸維摩詰有女名月上也

### 遊豐樂招提佛光三寺

竹鞋葵扇白綃巾林野為家雲是身山寺每遊多寄宿  
都城暫出即經旬漢容黃綺為逋客堯放巢由作外臣  
昨日制書臨郡縣不談愚谷醉鄉人

醉中得上都親友書以予停俸多時憂問貧乏

偶乘酒興詠而報之

頭白醉昏昏狂歌秋復春一生耽酒客五度棄官人蘇州刑部

侍郎河南尹同州刺史太子少傅皆以病免也異世陶元亮前生劉伯倫臥將琴作枕

行以鋪隨身歲要衣三對年支穀一困園葵烹佐飯林

葉埽添薪沒齒甘蔬食搖頭謝摺紳自能拋爵祿終不  
惱交親但得杯中涿從生甑上塵煩君問生計憂醒不  
憂貧

### 池畔逐涼

風清泉冷竹修修三伏炎天涼似秋黃犬引迎騎馬客  
青衣扶下釣魚舟衰容自覺宜閒坐蹇步誰能更遠遊  
料得此身終老處只應林下與灘頭

### 池鶴八絕句 并序

池上有鶴介然不羣烏為雞鵝次第嘲噪諸禽似有  
所誚鶴亦時復一鳴余非冶長不通其意因戲與贈  
荅以意斟酌之聊亦自取笑耳

### 雞贈鶴



三子廿七  
白香山言後集卷十七  
一聲警露君能薄五德司晨我用多  
不會悠悠時俗士  
重君輕我意如何

鶴荅雞

爾爭伉儷泥中鬪我整羽儀  
松上棲不可遣他天下眼  
却輕野鶴重家雞

烏贈鶴

與君白黑太分明縱不相親莫見輕  
我每夜啼君怨別  
玉徽琴裏忝同聲

琴曲有烏夜啼別鶴怨

鶴荅烏

吾愛棲雲上華表汝多攫肉下田中  
吾音中羽汝聲角  
琴曲雖同調不同

別鶴怨在羽調烏夜啼在角調

鳶贈鶴

君誇名鶴我名鳶君叫聞天我戾天  
更有與君相似處  
飢來一種啄腥羶

鶴荅鳶

無妨自是莫相非清濁高低各有歸  
鸞鶴羣中彩雲裏  
幾時曾見喘鳶飛

鵝贈鶴

君因風送入青雲我被人驅向鴨羣  
雪頸霜毛紅網掌  
請看何處不如君

鶴荅鵝

右軍歿後欲何依只合隨雞逐鴨飛  
未必犧牲及吾輩  
大都我瘦勝君肥

談氏小外孫玉童



外翁七十孫三歲笑指琴書欲遣傳自念老夫今耄矣  
因思穉子更茫然中郎餘慶鍾羊祜子幼能文似馬遷  
才與不才爭料得東牀空後且嬌憐談氏初逝

### 送後集往廬山東林寺兼寄雲臯上人

附東林白氏文集記昔余為江州司馬時常與廬山長老於東林寺  
經藏中披閱遠大師與諸文士唱和集卷諸長老請余文集亦置經  
藏唯然心許他日致之治茲餘二十年矣今余前後所著文大小合二  
千九百六十四首成六十卷編次既畢納於藏中且欲與二林結他生之  
緣復曩歲之志也故自忘其鄙拙焉仍請本寺長老及主藏僧依遠  
公文集例不借外客不出寺門幸甚太和九年夏太子賓客晉陽縣  
開國男太原白居易樂天記

後集寄將何處去故山迢遞在匡廬舊僧獨有雲臯在  
三二年來不得書別後道情添幾許老來筋力又何如  
來生緣會應非遠彼此年過七十餘

立名按太和九年公年六十四此云年過七十餘疑  
此記之後別有寫本寄廬山耳附原記以備參攷

客有說客即李浙東也所  
說不能具錄其事

近有人從海上迴海山深處見樓臺中有仙龕虛一室  
多傳此待樂天來

### 荅客說

吾學空門非學仙恐君此說是虛傳海山不是我歸處  
歸即應歸兜率天予晚年結彌勒  
上生業故云

立名按避暑錄事載唐人盧肇逸史記李浙東李君稷也會昌初為浙東觀察  
使言有海賈遭風飄海中大山視其殿榜曰蓬萊旁一院高鎖其嚴花木盈庭  
中設几案或人告之曰此白樂天院在中國未來耳  
唐小說事多誕此既自見於樂天詩當不謬也

### 哭劉尚書夢得二首

四海齊名白與劉百年交分兩綢繆同貧同病退閒日  
一死一生臨老頭杯酒英雄君與操曹公曰天下英雄  
唯使君與操耳文章

微婉我知丘仲尼云後世知丘者春秋  
又云春秋之言微而婉也賢豪雖歿精靈在應共微



吾子之八  
白香山言後集卷十七

之地下遊  
今日哭君吾道孤寢門淚滿白髭鬚不知箭折弓何用  
兼恐脣亡齒亦枯官官窮泉埋寶玉駸駸落景挂桑榆  
夜臺暮齒期非遠但問前頭相見無

立名按唐詩紀事禹錫晚年與白傳友善詩筆文章時無在其右者嘗與唱和往來又云禹錫與樂天唱和號劉白唱和集與裴度唱和號汝洛集與令狐楚號彭陽唱和集與李德裕號吳蜀集○禹錫嘗品題樂天詩云鄙人斤斲無痕迹仙人衣常棄刀尺世人方內欲相從行盡四維無處賣元真公之知己也

昨日復今辰

昨日復今辰悠悠七十春所經多故處却想似前身散  
秩優游老閒居清淨一作淨潔貧螺杯中有物鶴髦上無塵解  
佩收朝帶抽簪換野巾風儀與名號別是一生人

病瘡

門有醫來往庭無客送迎病銷談笑興老足歎嗟聲鶴

伴臨池立人扶下砌行脚瘡春斷酒那得有心情

遊趙邨杏花

趙邨紅杏每年開十五年來看幾迴七十三人難再到  
今春來是別花來

刑部尚書致仕

十五年來洛下居道緣俗累兩何如迷路心迴因向佛  
宦途事了是懸車全家遯世曾無悶半俸資身亦有餘  
唯是名銜人不會毗耶長者白尚書

初致仕後戲酬畱守牛相公

并呈分司諸寮友

南北東西無所羈挂冠自在勝分司看花嘗酒多先到  
拜表行香盡不知魚筍烹魚飽餐後擁袍枕臂醉眠時  
報君一語君應笑兼亦無心羨保釐



問諸親友

七十人難到過三更較稀占花租野寺定酒典朝衣趁  
醉春多出貪歡夜未歸不知親故口道我是耶非

戲問牛司徒

抖擻塵纓捋白鬚半酣扶起問司徒不知詔下懸車後  
醉舞狂歌有例無

不與老為期

不與老為期因何兩鬢絲纔應免天促便已及衰羸昨  
夜夢何在明朝身不知百憂非我所三樂是吾師閉目  
常閒坐低頭每靜思存神機慮息養氣語言遲行亦攜  
詩篋眠多枕酒卮自慙無一事少有不安時

開龍門八節石灘詩二首 并序

東都龍門潭之南有八節灘九峭石船筏過此例反  
破傷舟人楫師推挽束縛大寒之月躑躅水中飢凍  
有聲聞於終夜予嘗有願力及則救之會昌四年有  
悲智僧道遇適同發心經營開鑿貧者出力仁者施  
財於戲從古有礙之險未來無窮之苦忽乎一旦盡  
除去之茲吾所用適願悵心拔苦施樂者耳豈獨以  
功德福報為意哉因作二詩刻題石上以其地屬寺  
事因僧故多引僧言見志

鐵鑿金鎚殷若雷八灘九石劒稜摧竹篙桂楫飛如箭  
百筏千艘魚貫來振錫導師憑衆力揮金退傅施家財  
他時相逐西方去莫慮塵沙路不開

七十三翁旦暮身誓開險路作通津夜舟過此無傾覆



朝脛從今免苦辛十里叱灘變河漢八寒陰獄化陽春  
八寒地獄見佛名及涅槃經故以八節灘為比我身雖歿心長在閻施慈悲與後人

閒坐

婆婆放雞犬嬉戲任兒童閒坐槐陰下開襟向晚風  
漚麻池水裏曬棗日陽中人物何相稱居然田舍翁

酬寄牛相公同宿話舊勸酒見贈

每來政事堂中宿共憶華陽觀裏時日暮獨歸愁米盡  
泥深同出借驢騎交游今日唯殘我富貴當年更有誰  
彼此相看頭雪白一杯可合重推辭

道場獨坐

整頓衣巾拂淨牀一餅秋水一鑪香不論煩惱先須去  
直到菩提亦擬忘朝謁久停收劍珮宴遊漸罷廢壺觴

世間無用殘年處祇合逍遙坐道場

偶作寄朗之

歷想為官日無如刺史時歡娛接賓客飽暖及妻兒自  
到東都後安閒更得宜分司勝刺史致仕勝分司何況  
園林下欣然得朗之仰名同舊識為樂即新知有雪先  
相訪無花不作期鬪醲乾釀酒誇妙細吟詩里巷千來  
往都門五別離岐分兩回首書到一開眉葉落槐亭院  
水生竹閣池崔羅誰問訊鶴氅罷追隨身與心俱病容  
將力共衰老來多健忘唯不忘相思

狂吟七言十四韻

亦知世是休明世自想身非富貴身但恐人間為長  
物不如林下作遺民遊依二室成三友住近雙林當四



鄰性海澄淳平少浪心田灑埽淨無塵香山閒宿一千  
 夜梓澤連游十六春是客相逢皆故舊無僧每見不殷  
 勤藥停有喜閒銷疾金盡無憂醉忘貧補綻衣裳媿妻  
 女支持酒肉賴交親俸隨日計錢盈貫祿逐年支粟滿  
 困尚書致仕請半俸百斛亦五十千歲給祿粟二千可為洛堰魚鮮供取足游邨果熟饋爭  
 新詩章人與傳千首壽命天教過七旬點檢一生微倖  
 事東都除我更無人

喜裴濤使君攜詩見訪醉中戲贈

忽聞扣戶醉吟聲不覺停杯倒屣迎共放詩狂同酒癖  
 與君別是一親情

得潮州楊相公繼之書并詩以此寄之

詩情書意兩殷勤來自天南瘴海濱初覩銀鈎還啓齒

細吟瓊什欲霑巾鳳池隔絕三千里蝸舍沈冥十五春

唯有新昌故園月至今分照兩鄉人鳳池屬楊相也蝸舍自謂也

宿府池西亭

池上平橋橋下亭夜深睡覺上橋行白頭老尹重來宿  
 十五年前舊月明

閒眠

暖牀斜臥日曛腰一覺閒眠百病銷盡日一餐茶兩椀  
 更無所要到明朝

楊柳枝詞

東溪友議居易有妓樊素善歌小蠻善舞嘗為詩曰櫻桃樊素口楊柳小蠻腰年既高邁而小蠻方豐豔因楊柳詞以託意云

一樹春風千萬枝嫩於金色軟於絲永豐西角荒園裏  
 盡日無人屬阿誰



詔取永豐柳植禁苑感賦

又云宣宗朝國樂唱前詞上問誰作永豐在何處左右具以對遂因東使命取永豐柳兩枝植於禁中居易感上知其名且好尚風雅又為章

一樹衰殘委泥土雙枝榮耀植天庭定知玄象今春後  
柳宿光中添兩星

和

東都 留守韓琮

新柳歌中得翠條遠移金殿種青霄上陽宮女吞聲  
送不分先歸舞細腰

河南 尹盧貞和

永豐坊西南角園中有垂柳一株柔條極茂白尚書曾賦詩傳入樂府徧流京都近有詔旨取兩枝植於禁苑乃知一顧增十倍之價非虛言也因此偶成絕句非敢繼和前篇

一樹依依在永豐兩枝飛去杳無蹤玉皇曾采人間

曲應逐歌聲入九重

齋居春久感事遣懷

齋戒坐三旬笙歌發四鄰月明停酒夜眼闇看花人賴  
學空為觀深知念是塵猶思閒語笑未忘舊交親久作  
龍門主多為免苑賓水嬉歌盡日雪宴燭通晨事事皆  
過分時時自問身風光拋得也七十四年春

每見呂南二郎中新文輒竊有所歎惜因成長  
句以詠所懷

雙金百鍊少人知縱我知君徒爾為望梅閣老無妨渴

二語詞藻為贍麗衆多以予曾忝制誥此官故呼閣老畫餅尚書不救飢喻無益自戲也白日回頭看

又晚青雲舉足躡何遲壯年可惜虛銷擲遣把閒杯吟

詠詩



歡喜二偈

得老加年誠可喜當春對酒亦宜歡心中別有歡喜事  
開得龍門八節灘

眼暗頭旋耳重聽平聲唯餘心口尚醒醒今朝歡喜緣何  
事禮徹佛名百部經

閒居貧活計

冠蓋閒居少簞瓢陋巷深稱家開戶牖量力置園林儉  
薄身都慣營為力不任飢烹一斤肉暖臥兩重衾尊有  
陶潛酒囊無陸賈金莫嫌貧活計更富即勞心

贈諸少年

少年莫笑我蹉跎聽我狂翁一曲歌入手榮名取雖少  
關心穩事得還多老慙退馬雷芻秣謂致仕半俸也高喜歸鴻脫

弋羅官給俸錢天與壽此此貧病柰吾何

感所見

巧者焦勞智者愁愚翁何喜復何憂莫嫌山木無人用  
大勝籠禽不自由網外老雞因斷尾盤中鮮膾為吞鈎  
誰人會我心中事冷笑時時一掉頭

寄黔州馬常侍

閒看雙節信為貴樂飲一杯誰與同可惜風情與心力  
五年拋擲在黔中

和李相公畱守題漕上新橋六韻同用黎字

選石鋪新路安橋壓古堤似從銀漢下落傷玉川西影  
定闌干倒標高華表齊煙開虹半見月冷鶴雙棲材映  
夔龍小功嫌元凱低從容濟世後餘力及黔黎



閒居

風雨蕭條秋少客門庭冷靜晝多關金羈絡馬近賣却  
羅袖柳枝尋放還書卷略尋聊取睡酒杯淺把粗開顏  
眼昏入夜休看月脚重經春不上山心靜無妨喧處寂  
機忘兼覺夢中閒是非愛惡銷停盡唯寄空身在世間

新秋夜雨

蟋蟀暮啾啾光陰不少畱松檐半夜雨風幌滿牀秋曙  
早燈猶在涼初簟未收新晴好天氣誰伴老人遊

春眠

枕低被暖身安穩日照房門帳未開還有少年春氣味  
時時斲到睡中來

喜老自嘲

面黑頭雪白自嫌還自憐毛龜著下老蝙蝠鼠中仙名  
籍同逋客衣裝類古賢裘輕被白氎靴暖蹋烏氈周易  
休開卦陶琴不上絃任從人棄擲自與我周旋鐵馬因  
疲退鉛刀以鈍全行開第八秩時俗謂七十已上為開第八秩

河陽石尚書破迴鶻迎貴主過上黨射鷲驚繪

畫為圖猥蒙見示稱歎不足以詩美之按會昌三年癸亥正月劉

河大破回鶻迎太和公  
主以歸石雄劉河將也

塞北虜郊隨手破山東賊壘掉鞭收烏孫公主歸秦地

白馬將軍入潞州劔拔青鱗蛇尾活弦抨赤羽火星流

須知鳥目猶難漏尚書將入潞府偶逢水鳥鷺鷥引弓射之  
一發中目三軍躍其事上聞詔下美之縱有天

狼豈足憂畫角三聲刁斗曉清商一部管絃秋他時麟

閣圖勲業更合何人居上頭



自詠老身示諸家屬

壽及七十五俸霑五十千  
夫妻偕老日甥姪聚居年  
粥美嘗新米袍温換故緜  
家居雖濩落眷屬幸團圓  
置榻素屏下移爐青帳前  
書聽孫子讀湯看侍兒煎  
走筆還詩債抽衣當藥錢  
支分閒事了爬背向陽眠

自問此心呈諸老伴

朝問此心何所思暮問此心何所為  
不入公門慵斂手不看人面免低眉  
居士室間眠得所少年場上飲非宜  
閒談疊疊畱諸老美醞徐徐進一卮  
心未曾求過分事身常少有不安時  
此心除自謀身外更問其餘盡不如

六年立春日人日作

二日立春人七日盤蔬餅餌逐時新  
新年方吉鄭猶為少

家比劉韓未是貧鄉園節歲應堪重  
親故歡遊莫厭頻

試作循潮封眼想何由得見洛陽春

分司致仕官中古傳鄭詒議最老韓庶子劉員外尤貧循

潮封三郡遷客皆洛下舊遊也

立名按公以會昌六年八月卒宣宗以詩弔之曰綴玉聯珠六十年誰教冥路作詩仙  
浮雲不繫名居易造化無為字樂天童子解吟長恨曲胡兒能唱琵琶篇文章  
已滿行人耳一度思卿一愴然舊唐書謂公卒於大中元年蓋據此詩也然宣宗以  
會昌六年三月即位明年丁卯改元大中李商隱撰公碑及新書皆云卒於六  
年丙寅又皆云年七十五公生平作詩必紀年而  
集內無大中詩則舊書所謂大中元年殆誤耳

齋居偶作

童子裝爐火行添一炷香  
老翁持麈尾坐拂半張牀  
卷幔看天色移齋近日陽  
甘鮮新餅果穩暖舊衣裳  
止足安生理優閒樂性場  
是非一以遣動靜百無妨  
豈有物相累兼無情可忘  
不須憂老病心是自醫王

詠身



自中風來三歷閏病風八年凡三閏矣從懸車後幾逢春周南留滯

稱遺老見太史公傳漢上羸殘號半人見習鑿齒傳薄有文章傳子弟

斷無書札荅交親餘年自問將何用恐是人間賸長身

予與山南英華作荆南王僕射淮南李僕射事歷五朝

踰三紀海內年輩今唯三人榮路雖殊交情不

替聊題長句寄舉之公垂二相公

故交海內只三人二坐巖廊一臥雲老愛詩書還似我

榮兼將相不如君百年膠漆初心在萬里煙霄中路分

阿閣鸞凰野田鶴何人信道舊同羣

讀道德經

玄元皇帝著遺文烏角先生仰後塵金玉滿堂非已物

子孫委蛻是他人世間盡不關吾事天下無親於我身

只有一身宜愛護少教冰炭逼心神

禽蟲十二章并序

莊列寓言風騷比興多假蟲鳥以為筌蹄故詩義始

於關雎鵲巢道說先乎鯤鵬蜩鷃之類是也予閒居

乘興偶作一十二章頗類志怪放言每章可致一哂

一哂之外亦有以自警其衰老封執之惑焉頃如此

作多與故人微之夢得共之微之夢得嘗云此乃九

奏中新聲八珍中異味也有旨哉有旨哉今則獨吟

想二君在目能無恨乎

燕違戊己鵲避歲茲事因何羽族知疑有鳳皇頒鳥曆

一時一日不參差不知其然也燕銜泥常避戊己日鵲巢口常避太歲驗之皆信

水中科斗長成蛙林下桑蟲老作蛾蛙跳蛾舞仰頭笑



焉用鯤鵬鱗羽多

江魚羣從稱妻妾塞雁聯行號弟兄但恐世間真眷屬

親疎亦是強為名

故名也江沱間有魚每游輒三如騰隨妻一先二後土人號為婢妾魚禮云雁兄弟行

蠶老繭成不庇身蜂飢蜜熟屬他人須知年老憂家者

恐是二蟲虛苦辛

自警也

阿閣鸚鵡田舍烏妍蚩貴賤兩懸殊如何閉向深籠裏

一種摧頽觸四隅

有所感也

獸中去聲刀槍多怒吼鳥遭羅弋盡哀鳴羔羊口在緣何

事閻死屠門無一聲

有所悲也

蟪蛄殺敵蚊巢上蠻觸交爭蝸角中應似諸天觀下界

一微塵內鬪英雄

自照也

蠨蛸網上罨蜉蝣反覆相持死始休何異浮生臨老日

一彈指頃報恩讎

誠報也

蟻王化飯為臣妾螺母偷蟲作子孫彼此假名非本物

其間何怨更何恩

豆苗鹿嚼解烏毒艾葉雀銜奪燕巢鳥獸不曾看本草

諳知藥性是誰教

嘗獵者說云鹿若中箭發即嚼豆葉食之多消解箭毒多用烏頭故云烏毒又燕惡艾雀欲奪其巢先銜一艾

致其窠輒避去因而有之

一鼠得仙生羽翼眾鼠相看有羨色豈知飛上未半空

已作烏鳶口中食

鷺乳養雛遺在水魚心想子變成鱗細微幽隱何窮事

知者唯應是聖人

鷺為放乳水中不能離羣雛從而食之皆飽而去之又如魚想子子成魚並是佛經中說

白香山詩後集卷第十七



白香山詩別集一卷

古歛汪 立名 西亭 編訂

格律詩 凡十  
一首

窗中列遠岫 以題中平聲為韻 按各本  
別附宣州試射中正鵠賦後

天靜秋山好窗開曉翠通遙憐峰窈窕不隔竹朦朧 一作  
蒙籠

萬點當虛室千重疊遠空列檐攢秀氣緣隙助清風碧

愛新晴後明宜反照中宣城郡齋在望與古時 一作  
古詩同

玉水記方流 以流字為韻六十字成 按各  
本別附省試性習相遠近賦後

原注中書侍郎高郵下試貞元  
十六年二月十四日及第四人

良璞含章久寒泉徹底幽矩浮光濼濼 一作尹和  
光泛泛 方折浪悠

悠凌亂波紋異縈迴水性柔似風搖淺瀨疑 一作  
如 月落清

流潛潁應傍達藏真豈上浮玉人如不見淪棄即千秋



立名按貞元十六年公年二十九唐詩紀事作二十八誤也洪景廬容齋五筆予考登科記樂天以正元十六年庚辰中書舍人高郢下第四人與公自注正合且記事載鄭愈吳丹杜元穎王水記方流詩云愈登貞元十六年進士第吳丹杜元穎白居易皆同年又云居易德宗貞元十六年己卯高郢下及第時年二十八不知德宗貞元十六年乃庚辰非己卯也公壬子生至庚辰為二十九然則二十八者殆因己卯而訛耳又注云傳作二十七李商隱墓銘作二十六按新書不詳登第年歲舊書但誤作十四年進士第未嘗云二十七至李作墓碑亦僅曰前進士並無二十六及第語矛盾如此不知何所據也公應試詩賦皆擅名一時唐摭言貞元中樂天應宏詞試漢高祖斬白蛇賦考落蓋賦有知我者謂我斬白帝不知我者謂我斬白蛇也然登科之人賦並無聞白公之賦傳於天下也容齋隨筆唐銓選凡試判登科謂之入等甚拙者謂之藍縷遂未滿而試文三篇謂之宏辭試判三條謂之拔萃中者即授官按樂天後以拔萃登科

### 大社觀獻捷詩

以功守為韻四韻成

原注元和二年十一月四日自集賢院召赴銀臺候旨五日召入翰林奉敕試制書詔批荅詩等五首翰林院使梁守謙奉宣宜授翰林學士數月除左拾遺

淮海妖氛滅乾坤嘉一作喜氣通班師郊社內操袂凱歌中  
廟算無遺策天兵不戰功小臣同鳥獸率舞向皇風

立名按元稹酬樂天六韻詩自注云樂天於翰林中書取詔批荅等撰為程式禁中號白白樸每有新入學士求訪寶重過於六典也

### 自誨

樂天樂天來與汝言汝宜拳拳終身行焉物有萬類錮人如鎖事有萬感熱人如火萬類遞來鎖汝形骸使汝未老形枯如柴萬感遞至火汝心懷使汝未死心化為灰樂天樂天可不大哀汝胡不懲往而念來人生百歲七十稀設使與汝七十期汝今年已四十四却後二十六年能幾時汝不思二十五六年來事疾速倏忽如一寐往日來日皆瞥然胡為自苦於其間樂天樂天可不  
大哀而今而後汝宜飢而食渴而飲晝而興夜而寢無浪喜無妄憂病則臥死則休此中是汝家此中是汝鄉汝何捨此而去自取其遑遑遑遑兮欲安往哉樂天樂天歸去來



立名按公年四十四為憲宗元和十年乙未是年盜殺武相元衡公以請捕賊不悅於執政謫江州即在是年

三謠 并序

余廬山草堂中有朱藤杖一蟠木机一素屏風二時多杖藤而行隱机而坐掩屏而臥宴息之暇筆研在前偶為三謠各導其意亦猶座右陋室銘之類爾

蟠木謠

蟠木蟠木有似我身不中乎器無用於人下擁腫而上  
麟菌桷不桷兮輪不輪天子建明堂兮既非梁棟諸侯  
斲大輅兮材又不中唯我病夫或有所用用爾為几承  
吾臂支吾頤而已矣不傷爾性不枉爾理爾怏怏為几  
之外無所用爾爾既不材吾亦不材胡為乎人間徘徊  
蟠木蟠木吾與汝歸草堂去來

素屏謠

素屏素屏胡為乎不文不飾不丹不青當世豈無李陽  
冰之篆字張旭之筆迹邊鸞之花鳥張藻之松石吾不  
令加一點一畫於其上欲爾保真而全白吾於香爐峰  
下置草堂二屏倚在東西牆夜如明月入我室一作懷曉如  
白雲圍我牀我心久養浩然氣亦欲與爾表裏相輝光  
爾不見當今甲第與王宮織成步障錦屏風綴珠陷鈿  
貼雲母五金七寶相玲瓏貴豪待此方悅目然肯寢臥  
乎其中素屏素屏物各有所宜用各有所施爾今木為  
骨兮紙為面捨吾草堂欲何之

朱藤謠

朱藤朱藤温如紅玉直如朱繩自我得爾以為杖大有



四子五八  
禪於股肱前年左選東南萬里交遊別我於國門親友  
送我於滄水登高山兮車倒輪摧渡漢水兮馬跼蹄開  
中途不進部曲多迴唯此朱藤實隨我來瘴癘之鄉無  
人之地扶衛衰病驅訶魑魅吾獨一身賴爾爲二或水  
或陸自北徂南泥黏雪滑足力不堪吾本兩足得爾爲  
三紫霄峰頭黃石巖下松門石磴不通輿馬吾與爾披  
雲撥水環山繞野二年躅徧匡廬間未嘗一步而相捨  
雖有佳子弟良友朋扶危助蹇不如朱藤嗟乎窮旣若  
是通復何如吾不以常杖待爾爾勿以常人望吾朱藤  
朱藤吾雖青雲之上黃泥之下誓不棄爾於斯須

無可柰何歌

無可柰何兮白日走而朱顏頹少日往而老日催生者

不住兮死者不迴况乎寵辱豐頽之外物又何常不十  
去而一來去不可挽兮來不可推無可柰何兮已焉哉  
惟天長而地久前無始兮後無終嗟吾生之幾何寄瞬  
息乎其中又如太倉之稊米委一粒於萬鍾何不與道  
逍遙委化從容縱心放志洩洩融融胡爲乎分愛惡於  
生死繫憂喜於窮通倔強其骨髓齟齬其心胷合冰炭  
以交戰祇自苦兮厥躬彼造物者云何不爲此與化者  
云何不隨或煦或吹或盛或衰雖千變與萬化委一順  
以貫之爲彼何非爲此何是誰冥此心夢蝶之子何禍  
非福何吉非凶誰達此觀喪馬之翁俾吾爲秋毫之杪  
吾非自足不見其小俾吾爲泰山之阿吾亦無餘不見  
其多是以達人靜則昭然與陰合迹動則浩然與陽同



四ノ五  
波委順而已孰知其他時邪命邪吾其無柰彼何委邪  
順邪彼亦無柰吾何夫兩無柰何然後能冥至順而合  
太和故吾所以飲太和扣至順而爲無可柰何之歌

池上篇

并序

都城風土水木之勝在東南偏東南之勝在履道里  
里之勝在西北隅西開北垣第一第即白氏叟樂天  
退老之地地方十七畝屋室三之一水五之一竹九  
之一而島樹橋道間之初樂天旣爲主喜且曰雖有  
臺無粟不能守也乃作池東粟廩又曰雖有子弟無  
書不能訓也乃作池北書庫又曰雖有賓朋無琴酒  
不能娛也乃作池西琴亭加石樽焉樂天罷杭州刺  
史時得天竺石一華亭鶴二以歸始住西平橋開環

池路罷蘇州刺史時得太湖石白蓮折腰菱青版舫  
以歸又作中高橋通三島逕罷刑部侍郎時有粟千  
斛書一車洎臧獲之習筦磬絃歌者指百以歸先是  
潁川陳孝山與釀法酒味甚佳博陵崔晦叔與琴韻  
甚清蜀客姜發授秋思聲甚淡弘農楊貞一與青石  
三方長平滑可以坐臥太和三年夏樂天始得請爲  
太子賓客分秩於洛下息躬於池上凡三任所得四  
人所與洎吾不才身今率爲池中物矣每至池風春  
池月秋水香蓮開之旦露清鶴唳之夕拂楊石舉陳  
酒援崔琴彈姜秋思頽然自適不知其他酒酣琴罷  
又命樂童登中島亭合奏霓裳散序聲隨風飄或凝  
或散悠揚於竹煙波月之間者久之曲未竟而樂天



陶然已醉睡於石上矣睡起偶詠非詩非賦阿龜握  
筆因題石間視其粗成韻章命為池上篇云爾

十畝之宅五畝之園有水一池有竹千竿勿謂土狹勿  
謂地偏足以容膝足以息肩有堂有庭有橋有船有書  
有酒有歌有絃有叟在中白鬚飄然識分知足外無求  
焉如鳥擇木姑務巢安如龜居坎不知海寬靈鶴怪石  
紫茭白蓮皆吾所好盡在吾前時飲一杯或吟一篇妻  
孥熙熙雞犬閒閒優哉游哉吾將終老乎其間

立名按公有奉和牛思黯太湖石兼呈夢得詩其末云共嗟無此分虛管太湖來  
自注與夢得俱典姑蘇而不獲此石而此詩序中又云罷蘇州刺史時得太湖石  
豈歸洛既久舊物皆不復存邪

齒落辭 并序

開成二年予春秋六十六瘠黑衰白老狀具矣而雙

齒又隋慨然感歎者久之因為齒落辭以自廣其辭

曰

嗟嗟乎雙齒自吾有之爾俾爾嚼肉咀蔬銜杯漱水豐  
吾膚革滋吾骨髓從幼逮老勤亦至矣幸有輔車非無  
斷齧胡然捨我一旦雙落齒雖無情吾豈無情老與齒  
別齒隨涕零我老日來爾去不迴嗟嗟乎雙齒孰謂而  
來哉孰謂而去哉齒不能言請以意宣為口中之物忽  
乎六十餘年昔君之壯也血剛齒堅今君之老矣血衰  
齒寒輔車斷齧日削月朘上參差而下觚齶曾何足以  
少安嘻君其聽哉女長辭姥臣老辭主髮衰辭頭葉枯  
辭樹物無細大功成者去君何嗟嗟獨不聞諸道經我  
身非我有也蓋天地之委形君何嗟嗟又不聞諸佛說



四〇六十二  
是身如浮雲須臾變滅由是而言君何有焉所宜委百骸而順萬化胡爲乎嗟嗟於一牙一齒之間吾應曰吾過矣爾之言然

不能忘情吟 并序

樂天既老又病風乃錄家事會經費去長物妓有樊素者年二十餘綽綽有歌舞態善唱楊枝人多以曲名名之由是名聞洛下籍在經費中將放之馬有駱者駟壯駿穩乘之亦有年籍在經物中將鬻之圉人牽馬出門馬驤首反顧一鳴聲音間侶知去而旋戀者素聞馬嘶慘然立且拜婉孌有辭辭具下辭畢泣下予聞素言亦愍默不能對且命迴勒反被飲素酒自飲一杯悵吟數十聲聲成文文無定句句隨吟之短長

也凡二百五十五言噫予非聖達不能忘情又不至於不及情者事來攪情情動不可柅因自哂題其篇曰不能忘情吟吟曰

鬻駱馬兮放楊柳枝掩翠黛兮頓金羈馬不能言兮長鳴而却顧楊柳枝再拜長跪而致辭辭曰主乘此駱五年凡千有八百日銜檠之下不驚不逸素事主十年凡三千有六百日巾櫛之間無違無失今素貌雖陋未至衰摧駱力猶壯又無虺隤即駱之力尚可以代主一步素之歌亦可以送主一杯一旦雙去有去無迴故素將去其辭也苦駱將去其鳴也哀此人之情也馬之情也豈主君獨無情哉予俯而歎仰而吟且曰駱駱爾勿嘶素素爾勿啼駱反廐素反閨吾疾雖作年雖頽幸未及



項籍之將死何必一日之內棄騅兮而別虞兮乃目素  
兮素兮為我歌楊柳枝我姑酌彼金罍我與爾歸醉鄉  
去來

立名按冷齋夜話東坡南遷侍兒王朝雲者請從行東坡佳之作詩有不學楊枝別  
樂天句其序云世謂樂天有蕩駱放楊枝詞佳其至老病不忍去也然慈得詩曰春  
盡絮飛留不得隨風好去落誰家樂天亦云病與  
樂天相共住春同換素一時歸則是樊素竟去也

白香山詩別集一卷

白香山詩集補遺卷上

古歛汪 立名 西亭 蒐輯

格律詩 凡五十  
五首

勸酒 以下出文  
苑英華

昨與美人對尊酒朱顏如花腰似柳今與美人傾一杯  
秋風颯颯頭上來年光似水向東去兩鬢不禁白日催  
東鄰起樓高百尺璇題照日光相射珠翠無非二八人  
盤筵何啻三千客鄰家儒者方下帷夜誦古書朝忍飢  
身年三十未入仕仰望東鄰安可期一朝逸翮乘風勢  
金榜高張登上第春闈未了冬登科九萬搏風誰與繼  
不逾十稔居台衡門前車馬紛縱橫人人仰望在何處  
造化筆頭雲雨生東鄰高樓色未改主人一作父云亡息猶



在金玉車馬一不存朱門更有何人待牆垣反鎖長安  
 春樓臺漸漸屬西鄰松篁薄暮亦棲鳥一作鳴桃李無情  
 還笑人憶昔東鄰宅初構雲霓彩棟皆非舊瑇瑁筵前  
 翡翠棲芙蓉池上鴛鴦鬪日往月來凡幾秋一衰一盛  
 何一作皆悠悠但教帝里笙歌在池上年年醉五侯

南陽小將張彥瑛口鎮稅人場射虎歌

海內昔年狎太平橫目穰穰何崢嶸天生天殺豈天怒  
 忍使朝朝餵猛虎關東驛路多丘荒行人最忌稅人場  
 張彥雄特制殘暴見之叱起如叱羊鳴弦霹靂越幽阻  
 往往依林猶旅拒草際旋看委錦茵腰間不更一作見抽白  
 羽老饕已斃衆雛恐童穉椰揄皆自勇忠良效順勢亦  
 然一劒猜狂敢輕動有文有武方為國不是英雄伏不

得試徵張彥作將軍幾箇將軍願策勳

陰雨

潤葉濡枝浹四方濃雲來去勢何長曠然寰宇清風滿  
 救旱功高暑氣涼

喜雨

西北油然雲勢濃須臾霧沛雨飄空頓疎萬物焦枯意  
 定看秋郊稼穡豐

過故洛城

故城門前春日斜故城門裏無人家市朝欲認不知處  
 漠漠野田飛草花

立名按太平寰宇記故洛城在洛陽縣二十里東西七里南北九里內宮殿臺觀  
 府藏寺舍魏晉之代凡有一萬一千二百一十九門自永嘉之亂劉曜入洛陽元帝  
 渡江官署里閣鞠為茂草至後魏孝文帝幸洛陽巡故宮遂詠黍離之詩羣臣侍從無不感愴



誚失婢榜

出唐詩紀事

宅院小牆卑坊門帖榜遲舊恩慙自薄前事悔難追籠  
鳥無常主風花不戀枝今宵在何處惟有月明知

立名按劉賓客集有和樂天誚失婢榜者詩云把鏡朝猶在添香夜不歸鴛鴦拂  
瓦去鸚鵡遠籠飛不逐張公子即隨劉武威新知正相樂從此脫青衣堯山堂外  
紀唐人有誚失婢榜詩原情寄朝云撫養在香閣嬌癡教不依縱然桃葉寵打  
得柳花飛曉露空調粉春羅在賜衣內家方妒殺好處任從歸偷鎖出深閨風  
花何所依想因來月去難道綽天飛燭暗新垂淚香凝舊舞衣因情如不斷還  
向夢中歸搖扇詩因依千聲叫不歸頭盤紅縷髻身著紫羅衣夾帶無金玉  
富藏有是非請君看  
賞格惆悵信音稀

江南喜逢蕭九徹因話長安舊遊戲贈五十韻

出才調集

憶昔嬉遊伴多陪歡宴場寓居同永樂幽會共平康師  
子尋前曲聲兒出內坊花深態奴宅竹錯得憐堂庭晚  
開紅藥門閑蔭綠楊經過悉同巷居處盡連牆時世高

梳髻風流澹作妝戴花紅石竹帔暈紫檳榔鬢動懸蟬  
翼釵垂小鳳行拂眉輕粉絮煖手小香囊選勝移銀燭  
邀歡舉玉觴爐煙凝麝氣酒色注鶯黃急管停還奏絲  
絃慢更張雪飛迴舞袖塵起繞歌梁舊曲翻調笑新聲  
打義揚名情推阿軌巧語許秋孃風暖春將暮星迴夜  
未央宴餘添粉黛坐久換衣裳結伴歸深院分頭入洞  
房綵帷開翡翠羅薦拂鴛鴦畱宿爭牽袖貪眠各占牀  
綠窗籠水影紅壁背燈光索鏡收花鈿邀人解袷襠暗  
嬌妝靨笑私語口脂香怕聽鐘聲坐羞明映縵藏眉殘  
蛾翠淺鬢解綠雲長聚散知無定憂歡事不常離筵開  
夕宴別騎促晨裝去住青門外畱連滄水傍車行遙寄  
語馬駐共相望雲雨分何處山川共異方野行初寂莫



店宿乍恹惶別後嫌宵永愁來厭歲芳幾看花結子頻  
 見露為霜歲月何超忽音容坐渺茫往還書斷絕來去  
 夢遊揚自我辭秦地逢君客楚鄉常嗟異岐路忽喜共  
 舟航話舊堪垂淚思鄉數斷腸愁雲接巫峽淚竹近瀟  
 湘月落紅湖闊天高節候涼浦深煙渺渺沙冷月蒼蒼  
 紅葉江楓老青蕪驛路荒野風吹蟋蟀湖水浸菰蔣帝  
 路何由見心期不可忘舊遊千里外往事十年強春晝  
 提壺飲秋林摘橘嘗強歌還自感縱飲不成狂永夜長  
 相憶逢君各共傷殷勤萬里意并寫贈蕭郎

贈薛濤 出張為  
主客圖

蛾眉山勢接雲霓欲逐劉郎北路迷若似剡中容易到  
 春風猶隔武陵溪

立名按唐詩紀事張為唐末江南人作詩人主客圖序曰若主人門下處其客者  
 以法度一則也以白居易為廣大教化主上入室楊乘入室張枯羊士諤元稹升  
 堂盧仝顧況沈亞之及門費冠卿皇甫松殷堯藩施肩吾周元範况元膺徐凝  
 朱可名陳標董勣卿以孟雲卿為高古奧逸主上入室韋應物入室李賀杜牧  
 李餘劉猛李涉胡幽正升堂李觀賈駝李宣古曹鄴劉駕孟遲及門陳潤  
 韋楚老以李益為清奇雅正主上入室蘇郁入室劉畋僧清塞盧林子鵠楊洵  
 姜張籍楊巨源楊敬之僧無可姚合升堂方干馬戴任蕃賈島厲元項斯薛濤及  
 門僧良又潘誠于武陵詹維衛華僧志定喻島朱慶餘以孟郊為清奇僻苦主  
 上入室陳陶周朴及門劉得仁李湏以鮑溶為博解宏拔主上入室李羣玉入室  
 司馬退之張為以武元衡為瑰奇美麗主上入室劉禹錫入室趙嘏長孫佐輔曹  
 唐升堂盧顥陳羽許渾張蕭遠及門張陵章孝標雍  
 陶周祚表不約圖凡八十四人每人各采其集警句

酬令狐畱守尚書見贈十韻 以下出錢氏  
絳雲樓藏本

長慶清風在夔龍變理餘太和膏雨降周邵保釐初嵩  
 少當宮署伊瀍入禁渠曉關開玉兔夕鑰納銀魚舊眷  
 憐移疾新吟念索居離聲雙白鸚行色一籃舉罷免無  
 餘俸休閒有救廬慵於嵇叔夜渴似馬相如酒每蒙酌  
 我 詩鄭箋云酌  
賣也音沽 詩嘗許起予洛中歸計定一半為尚書



聽蘆管

幽咽新蘆管淒涼古竹枝似臨猿峽唱疑在雁門吹調  
為高多切聲緣小乍遲麤豪嫌聲築細妙勝參差雲水  
巴南客風沙隴上兒屈原收淚夜蘇武斷腸時仰秣胡  
駒聽驚棲越鳥知何言胡越異聞此一同悲

送滕庶子致仕歸婺州

春風秋月攜歌酒八十年來翫物華已見曾孫騎竹馬  
猶聽侍女唱梅花入鄉不杖歸時健出郭乘輶到處誇  
兒著繡衣身衣錦東陽門戶勝滕家

送劉郎中赴任蘇州

仁風膏雨去隨輪勝境歡遊到逐身水驛路穿兒店月  
花船棹入女湖春

語兒店女墳湖皆勝地也

宣城獨詠窗中岫柳惲單題

汀上蘋何似姑蘇詩太守吟詩相繼有三人

領吳郡日劉嘗贈予詩云蘇州

刺史例能詩西掖今來替左司故有三人之戲耳

立名按語兒即御兒吳越分境越國西北置御兒與吳分為界通典注云在嘉興縣南有地名御兒也國語曰吾用御兒臨之今俗作語字又吳改木與為嘉興隋廢唐武德四年復置九年省入吳縣貞觀八年復置屬蘇州女墳湖吳地記云吳王葬女取土成湖又郡國志王女墳在郭西云蓋盧食蒸魚嘗半而與女女怒自殺闔廬痛之葬於國西閭門外文石為櫛金鼎玉杯銀尊珠襦悉以送女又記云以水澆墳因名女墳湖白蘋洲在湖州雲溪之東南去洲一里洲上有魯公顏真卿芳菲亭內有梁太守柳惲詩云汀洲采白蘋日暮江南春因為名以上並出太平寰宇記

福先寺雪中餞劉蘇州

送君何處展離筵大梵王宮大雪天庾嶺梅花落歌管  
謝家柳絮撲金田亂從紈袖交加舞醉入籃輦取次眠  
却笑召鄒兼訪戴只持空酒駕空船

除夜言懷兼贈張常侍

三百六旬今夜盡六十四年明日催不用歎身隨日老



亦須知壽逐年來加添雪興憑羶帳消殺春愁付酒杯  
唯恨詩成君去後紅箋紙卷為一作誰開

送張常侍西歸

二年花下為閒伴一旦尊前棄老夫西午橋街行帳望  
南龍興寺立踟躕洛城久住畱情否省騎重歸稱意無  
出鎮歸朝但相訪此身應不離東都

和河南鄭尹新歲對雪

白雪吟詩鈴閣開故情新興兩徘徊昔經勤苦照書卷  
今助歡娛飄酒杯楚客難酬郢中曲吳公兼占洛陽才  
銅街金谷春知否又有詩人作尹來

吹笙內人出家

雨露難忘君念重電泡易滅妾身輕金刀已剃頭然髮

佛經云若  
救頭然

玉管休吹腸斷聲新戒珠從衣裏得初心蓮向  
火中生道場夜半香花冷猶在燈前禮佛名

立名按鄭良孺詩話唐女妓入宜春院謂之內人亦曰前頭人謂在上前也骨  
肉居教坊謂之內人家有請奉其得幸者謂之十家蓋家雖多亦以十家呼之

醉中見微之舊卷有感

今朝何事一霑襟檢得君詩醉後吟老淚交流風病眼  
春箋搖動酒杯心銀鈎塵覆年年暗玉樹泥埋日日深  
聞道墓松高一丈更無消息到如今

壽安歇馬重吟

春衫細薄馬蹄輕一日遲遲進一程野棗花含新密氣  
山禽語帶破匏聲垂鞭晚就槐陰歇低倡閒衝柳絮行  
忽憶家園須速去櫻桃欲熟筍應生

贈張處士山人



四百五十二  
羅襟蕙帶竹皮巾雖到塵中不染塵每見俗人多慘澹  
惟逢美酒即殷勤浮雲心事誰能會老鶴風標不可親  
世說三生如不謬共疑巢許是前身

池畔閒坐兼呈侍中

池畔最平處樹陰新合時移牀解衣帶坐任清風吹舉  
棹鳥先覺垂綸魚未知前頭何所有一卷晉公詩

初冬即事憶皇甫十

冷竹風成韻荒街葉作堆欲尋聯句卷先飲煖寒杯帽  
爲迎霜戴爐因試火開時時還有客終不當君來

小庭寒夜寄夢得

庭小同蝸舍門閒稱雀羅火將燈共盡風與雪相和老  
睡隨年減衰情向夕多不知同病者爭柰夜長何

西還壽安路西歇馬

槐陰歇鞍馬柳絮惹衣巾日晚獨歸路春深多思人去  
家纔百里爲客只三旬已念紗窗下應生寶瑟塵

雨中訪崔十八

肩舁仍挈榼莫怪就君來秋雨經三宿無人勸一杯  
夢得得新書

池上今宵風月涼閒教少樂理霓裳集仙殿裏新詞到  
便播笙歌作樂章

初見劉二十八郎中有感

欲話毗陵君反袂欲言夏口我霑衣誰知臨老相逢日  
悲歎聲多語笑稀

夜題玉泉



遇客多言愛山水逢僧盡道厭嚙塵玉泉潭畔松間宿  
要且經年無一人

立名按太平寰宇記玉泉山在河南縣東南四十里山內  
內有玉泉寺近見西湖志收此詩誤以為杭州之玉泉也

拜表早出贈皇甫賓客

一月一回同拜表莫辭侵早過中橋老於君者應無數  
猶趁西京十五朝

贈鄭尹

府池東北舊亭臺久別長思醉一回但請主人空掃地  
自攜杯酒管絃來

別楊同州後却寄

潘驛橋南醉中別下邳邨北醒時歸春風怪我君知否  
榆葉楊花撲面飛

狐泉店前作

野狐泉上柳花飛逐水東流便不歸花水悠悠兩無意  
因風吹落偶相依

贈盧績

餘杭縣裏盧明吉虛白亭中白舍人今日相逢頭似雪  
一杯相勸送殘春

與裴華州同過敷水戲贈

使君五馬且踟躕馬上能聽絕句無每過桑間試畱意  
何妨後代有羅敷

閒遊

欲笑隨情酒逐身此身雖老未辜春春來點檢閒遊數  
猶自多於年少人



招韜光禪師 出潛說友咸淳臨安志

白屋炊香飯葷膾不入家  
瀘泉澄葛粉洗手摘藤花  
青芥除黃葉紅薑帶紫芽  
命師相伴食齋罷一甌茶

立名按咸淳臨安志法安院在靈隱寺西天福二年吳越王建舊額廣嚴唐長慶中有詩僧結菴於院之西自號韜光常與樂天偕和又云白侍郎長慶四年正月請韜光齋以詩招之即白屋炊香飯一首也韜光不赴齋以詩報白云山僧野性好林泉每向巖阿倚石眠不解栽松陪玉勒惟能引水種金蓮白雲乍可來青嶂明月難教下碧天城市不能飛錫去恐妨鶯囀翠樓前

和柳公權登齊雲樓 以下出范成大吳郡志

樓外春晴百鳥鳴  
樓中春酒美人傾  
路傍花日添衣色  
雲裏天風散珮聲  
向此高吟誰得意  
偶來閒客獨多情  
佳時莫起興亡恨  
游樂今逢四海清

毛公壇

毛公壇上片雲閒  
得道何年去不還  
千載鶴翎歸碧落

五湖空鎮萬重山

立名按范成大吳郡志毛公壇福地在洞庭山漢劉根得道處根既仙身生綠毛人或見之故名之曰毛公

靈巖寺

館娃宮畔千年寺  
水闊雲多客到稀  
聞說春來更惆悵  
百花深處一僧歸

白雲泉

天平山上白雲泉  
雲自無心水自閒  
何必奔衝山下去  
更添波浪向人間

立名按方輿勝覽天平山在城西二十里巍然特高羣峰拱揖都之鎮也山上有白雲泉為吳中第一水

寄韜光禪師 出東坡題跋

一山門一作分作兩山門  
兩寺原從一寺分  
東澗水流西澗水  
南山雲起北山雲  
前臺花發後臺見  
上界鐘聲下界聞



遙想吾師行道處 天香桂子落紛紛

立名按方輿勝覽虔州有天竺寺在水東三里東坡天竺寺詩香山居士留遺跡一首序云于年十二先君自虔州歸謂予言近城山中天竺寺有白樂天親書一山門作兩山門詩筆勢奇逸墨蹟如新今四十年予來訪之則詩已亡有刻石存耳感涕不已而作是詩又東坡書樂天此詩後云唐韜光禪師自錢唐天竺來住是山樂天守蘇日以此詩寄之慶曆中先君遊此猶見樂天真蹟後四十七年韜南還過虔復經此寺徒見石刻而已紹聖元年八月十七日是此詩固寄虔州也但韜光禪師本住靈隱故詩中有天香桂子語咸淳臨安志靈山之陰北澗之陽即靈隱寺靈山之南南澗之陽即天竺寺二澗流水號錢源泉遠寺峰南北而下至峰前合為一澗有橋號合澗又云靈隱天竺兩山由一門而入又云東坡虔州天竺寺詩引云云據此則樂天詩非為杭作故舊志不收但坡公贈杭州上天竺辨才二詩一云想見南北山花發前後臺一云南北一山門上下兩天竺又皆米白詩語姑附著於此以俟知者要之白詩自是寄杭州後韜光移錫與詩俱去故遺跡在虔耳

和夢得夏至憶蘇州呈盧賓客

以下出泰興李氏手校本

憶在蘇州日常諳 夏至筵糝香筒竹嫩炙脆子鷺鮮水  
國多臺榭吳風尚 管絃每家皆有酒無處不過船交印  
君相次褰帷我在前 此鄉俱老矣東望共依然  
予與劉虛三  
人前後相次  
洛下麥秋月江南梅雨天 齊雲樓上事已上

十三年

曲江

細草岸西東 酒旗搖水風 樓臺在花杪 鷗鷺下煙中 翠  
幄晴相接 芳洲夜暫空 何人賞秋景 興與此時同

歲夜詠懷兼寄思黯

徧數故交親 何人得六旬  
與思黯夢得數還論  
沒者少過得六十 今年已入手餘

事豈關身老 自無多興春 應不揀人陶 窗與弘閣風景  
一時新

寒食日過棗糲店

寒食棗糲店 春低楊柳枝 酒香畱客住 鶯語和人詩 困  
立攀花久慵行 上馬遲若為 將此意前字 與僧期

宿張雲舉院



不食胡麻飯杯中自得仙隔房

集作

招好客可室致芳筵

美

集作

家醞香醪嫩時新異果鮮夜深唯畏曉坐穩不集作思

眠碁罷嫌無敵詩成媿在前明朝題壁上誰得眾人傳

惜花

可憐天

集作

豔妍正當時剛被狂風一夜吹今日流鶯來舊

處百般言語泥

集作

啼空枝

七夕

煙霄微月澹長空銀漢秋期萬古同幾許歡情與離恨  
年年并在此宵中

宿誠禪師山房題贈

不出孤峰上人間四十秋視身如傳舍閱世任東流法  
為因緣立心從次第脩中宵問真偈有住是吾憂

新池

數日自穿鑿引泉來近陂尋渠通咽處繞岸待清時深  
好求魚養閒堪與鶴期幽聲聽難盡入夜睡常遲

南池

蕭條微雨絕荒岸抱清源入舫山侵塞分泉道接邨秋  
聲依樹色月影在蒲根淹泊方難遂他宵關夢魂

宿池上

泉來從絕壑亭敞在中流竹密無空岸松長可絆舟螭  
蛄潭上夜河漢島前秋異夕期新漲攜琴却此遊

翻經臺

出咸淳臨安志

一會靈山猶未散重翻貝葉有來由是名精進纔開眼  
巖石無端亦點頭



立名安潛說友咸淳臨安志天竺寺翻經臺謝靈運與僧於此將北本涅槃經翻焉

寄題上強山精舍七

王象之輿地紀勝今湖州石刻尚存

慣遊山水住南州行盡天台及虎丘惟有上強精舍寺

最堪遊處未曾遊

立名按湖州歸安縣上強山精舍寺有唐人題詩刻石白居易李伯藥高知周錢起郎士元皆有詩王象之輿地紀勝精舍院在歸安縣施渚青州刺史管聚捨宅為院白樂天寄題詩云

句二

學織繚綾功未多亂投機杼錯拋梭莫教宮錦行家見  
把此文章殺笑他 如今不重文章事莫把文章誇向

盧氏雜詔云盧氏子合下第步出都門投逆旅有一人續至吟詩云云盧愕然憶是白居易詩問之曰某世織綾錦以薄藝投本行皆云如今花樣與前不同且東歸去

白香山詩集補遺卷上



白香山詩集補遺卷下

雜體聯句 凡三十首

七老會詩

刑部尚書致仕太原白居易 年七十四并序

胡吉劉鄭盧張等六賢皆多年壽余亦次焉偶於東都敝居履道坊合成尚齒之會七老相顧既醉且歡靜而思之此會希有因各賦七言六韻詩一章以紀之或傳諸好事者會昌五年三月二十四日於白家履道宅同宴宴罷賦詩時祕書監狄兼謩河南尹盧貞以年未七十雖與會而不及列

七人五百八十四 今本作七人五百七十歲 拖紫紆朱垂白鬚手裏無金莫

嗟歎尊中有酒且歡娛吟成六韻神還壯飲到三杯氣

尚麗鬼峨狂歌教婢拍婆娑醉舞遣孫扶天年高過二

疏傳人數多於四皓圖除却三山五天竺 三仙山五天竺國多老壽者 人

間此會更應無



前懷州司馬安定胡杲

年八十九

閒居同會在三春大抵愚年最出羣霜鬢不嫌杯酒  
興白頭仍愛玉爐熏徘徊玩柳心猶健老大看花意  
却勤鑿落滿斟判醕酌香囊高挂任氤氳搜神得句  
題紅葉望景長吟對白雲今日交情何不替齊年同  
事聖明君

衛尉卿致仕馮翊吉皎

年八十八

休官罷任已閑居林苑園亭興有餘對酒最宜花藻  
發邀歡不厭柳條初低腰醉舞垂緋袖擊筑謳歌任  
褐裾寧用管絃來合雜自親松竹且清虛飛觥酒到  
須先酌賦詠成詩不住書借問商山賢四皓不知此  
後更何如

前磁州刺史廣平劉真

年八十七

垂絲今日幸同筵朱紫居身是大年賞景尚知心未  
退吟詩猶覺力完全閑庭飲酒當三月在席揮毫象  
七賢山茗煮時秋霧碧玉杯斟處彩霞鮮臨階花笑  
如歌妓傍竹松聲當管絃雖未學窮生死設人間豈  
不是神仙

前右龍武軍長史滎陽鄭據

年八十五

東洛幽閑日暮春邀歡多是白頭賓官班朱紫多相  
似年紀高低次第勻聯句每言松竹意停杯多說古  
今人更無外事來心肺空有清虛入思神醉舞兩回  
迎勸酒狂歌一曲會娛身今朝何事偏情重同作明  
時列任臣



前侍御史內供奉范陽盧真年八十三

三春已盡洛陽宮天氣初晴景象中千朵嫩桃迎曉日萬株垂柳逐和風非論官位皆相似及至年高亦共同對酒歌聲猶覺妙玩花詩思豈能窮先時共作三朝貴今日猶逢七老翁但願醪醕常滿酌煙霞萬里會應通

前永州刺史清河張渾年七十七

幽亭春盡共為歡印綬居身是大官道迹豈勞登遠岫垂絲何必坐谿磻詩聯六韻猶應易酒飲三杯未覺難每况襟懷同宴會共將心事比波瀾風吹野柳垂羅帶日照庭花落綺紈此席不煩鋪錦帳斯筵堪作畫圖看

九老圖詩 并序

會昌五年三月胡吉劉鄭盧張等六賢於東都敞居履道坊合尚齒之會其年夏又有二老年貌絕倫同歸故鄉亦來斯會續命書姓名年齒寫其形貌附於圖右與前七老題為九老圖仍以一絕贈之

洛中遺老李元爽年一百三十六

歸洛僧如滿年九十五

雪作鬚眉雲作衣遼東華表暮雙歸當時一鶴猶希有  
何況今逢兩令威

新唐書本傳白居易居東都履道里疏沼種樹構石樓香山鑿八節灘經月不食葷自號香山居士與胡杲吉皎劉真盧真張渾狄兼謩盧貞輩燕集皆高年不事者人慕之繪為九老圖立名按新書多約略意會之誤紀述頗失實如遺却李元爽及如滿僧而以狄盧為九老謬矣白集今本雖遺九老圖一絕句然而狄盧年未七十雖與會而不及列及詩中七人七賢等語具在則狄盧自不與九老之數明矣此香山千古佳話乃集中僅存公詩因從各本蒐考六老詩及後題絕句一首以歸補遺集

一字至七字詩



唐詩紀事樂天分司東洛朝賢悉會興化池亭送別酒酣各請一字至七字詩以題為韻

### 白居易賦詩

詩綺美瓌奇明月夜落花時能助歡笑亦傷別離調清  
金石怨吟苦鬼神悲天下只應我愛世間唯有君知自  
從都尉別蘇句便到司空送白辭

### 王起賦花

花點綴分葩露初裛月未斜一枝曲水千樹山家戲  
蝶未成夢嬌鶯語更誇既見東園成徑何殊西子同  
車漸覺風飄輕似雪能令醉者亂如麻

### 李紳賦月

月光輝皎潔耀乾坤靜空闊圓滿中秋翫爭詩哲玉  
兔鎬難穿桂枝人共折萬象照乃無私瓊臺豈遮君

謁抱琴對彈別鶴聲不得知音聲不切

### 令狐楚賦山

山聳峻回環滄海上白雲間商老深尋謝公遠攀古  
巖泉滴滴幽谷鳥關關樹島西連隴塞猿聲南徹荆  
蠻世人只向簪裾老芳草空餘麋鹿閑

### 元稹賦茶

茶香葉嫩芽慕詩客愛僧家碾雕白玉羅織紅紗銚  
煎黃檠色盃轉麴塵花夜後邀陪明月晨前命對朝  
霞洗盡古今人不倦將知醉亂豈堪誇

### 魏扶賦愁

愁迴野深秋生枕上起眉頭閨閣危坐風塵遠遊巴  
猿啼不住谷水咽還流送客泊舟入浦思鄉望月登



樓煙波早晚長羈旅絃管終年樂五侯

韋式郎中賦竹

竹臨池似玉裛露靜和煙綠抱節寧改貞心自束渭  
曲種偏多王家看不足仙杖正驚龍化美實當從鳳  
孰唯愁吹作別離聲回首駕驂舞陣速

張籍司業賦花

花落早開賒對酒客興詩家能迴遊騎每駐行車宛  
宛清風起茸茸麗日斜且願相畱歡洽惟愁虛棄光  
華明年攀折知不遠對此誰能更歎嗟

范堯佐道士賦書

書憑雁寄魚出王屋入匡廬文生益智道著清虛葛  
洪一萬卷惠子五車餘銀鈎屈曲索靖題橋司馬相

如別後莫睽千里信數封緘送到閑居

宴興化池亭送白二十二東歸聯句

東洛言歸去西園告別來白頭青眼客池上手中杯度  
離瑟殷勤奏仙舟委曲回征輪今欲動賓閣為誰開禹  
錫坐弄琉璃水行登綠褥苔花低妝照影萍散酒吹醅  
居易岸蔭新抽竹亭香欲變梅隨游多笑傲遇勝且徘徊  
籍澄澈連天鏡潺湲出地雷林塘難共賞鞍馬莫相催  
度信及魚還樂機忘鳥不猜晚晴槐起露新暑石添苔  
禹錫擬作雲泥別猶思頃刻陪歌亭珠貫斷飲罷玉  
峰頽居易雖有消搖志其如磊落才會當重入用此去  
肯悠哉籍

首夏猶清和聯句



記得謝家詩清和即此時居易餘花數種在密葉幾重  
 垂度芳謝人人惜陰成處處宜禹錫水萍爭點綴梁燕  
 共追隨行式亂蝶憐疎葉殘鶯戀好枝籍草香殊未歇  
 雲勢漸多奇居易單服初寧體新篁已出籬度與春為  
 別近覺日轉行遲禹錫繞樹風光少侵階苔蘚滋行式  
 唯思奉歡樂長得在西池籍

薔薇花聯句

似錦如霞色連春接夏開禹錫波紅分影入風好帶香  
 來度得地依東閣當階奉上台行式淺深皆有態次第  
 暗相催禹錫滿地愁英落綠堤惜權回度芳濃濡雨露  
 明麗隔塵埃行式似著胭脂染如經巧婦裁居易柰花  
 無別計只有酒殘杯籍

西池落泉聯句

東閣聽泉落能令夜興多行式散時猶帶沫淙處却跳  
 波度偏洗磷磷石還驚泛泛鵝籍色青塵不染光白月  
 相和居易噴雪縈松竹攢珠濺芰荷禹錫對吟時合響  
 觸樹更搖柯籍照圃紅分藥侵階綠浸莎居易日斜車  
 馬散餘韻逐鳴珂禹錫

杏園聯句

杏園千畝欲隨風一醉同人此暫同醉上老態忽忘絲鬢  
 裏衰顏宜解酒杯中絳上白曲江日暮殘紅盡翰苑年深  
 舊事空居易上二十四年流落者故人相引到花叢禹錫

花下醉中聯句

共醉風光地花飛落酒杯絳送二殘春猶可賞晚景莫相



催禹錫送白侍郎

酒幸年年有花應歲歲開

居易送兵部相公

且當金韻擲

莫遣玉山頽

絳送庾閣長

高會彌堪惜良時不易陪

承宣送主客

誰能

拉花住爭換得春回

禹錫送吏部

我輩尋常有佳人早晚來

嗣復

送兵部

寄言三相府欲散且徘徊

居易時戶部相公同會

喜遇劉二十八偶書兩韻聯句

病來佳興少老去舊遊稀笑語縱橫作杯觴絡繹飛度  
清談如冰玉逸韻貫珠璣高位當金鉉虛懷似布衣禹  
錫已榮狂取樂仍任醉忘機捨眷將何適畱歡便是歸  
居易風儀常欲附蛟力自知微願假尊壘末膺門自此  
依紳

劉二十八自汝赴左馮塗經洛中相見聯句

不歸丹掖去銅竹漫云云唯喜因過我須知未賀君度

詩聞安石詠香見令公熏欲首函關路來披緜嶺雲居  
易貂蟬公獨步鴛鴦我同羣插羽先飛酒交鋒便戰文  
紳鎮嵩知表德定鼎為銘勳顧鄙容商洛徵歡候汝墳  
禹錫頻年多謔浪此夕任喧紛故態猶應在行期未要  
聞度游藩榮已久捧被惜將分詎厭杯行疾唯愁日向  
曛居易窮陰初莽蒼離思漸氤氳殘雪午橋岸斜陽伊  
水濱紳上謨尊右掖全略靜東軍萬頃徒稱量滄溟詎  
有垠禹錫

予自到洛中與樂天為文酒之會時時構詠樂  
不可支則慨然共憶夢得而夢得亦分司至止  
歡愜可知因為聯句

成周文酒會吾友勝鄒枚唯憶劉夫子而今又到來度



欲迎先倒屣一座便傾杯飲許伯倫石詩推公幹才

並以本事

居易久曾聆郢唱重喜上燕臺晝話牆陰轉宵歡斗柄

迴禹錫新聲還共聽故態復相哈遇物皆先賞從花半

未開度起時烏帽側散處玉山頽墨客喧東閣文星犯

上台居易詠吟君稱首疎放我為難憶戴何勞訪

時夢得分司而

來畱髡不用猜

宴席上老夫暫起樂天密坐不動足

夢得奉觴承麴蘖落筆捧

瓊瑰醉弁無妨側詞鋒不可摧

此兩韻美令公也

居易水軒看翡翠

石徑踐莓苔童子能騎竹佳人解詠梅

陪遊南宅之境

禹錫洛中

三可矣鄴下七悠哉自向風光急不須絃管催度樂觀

魚踴躍閒愛鶴徘徊煙柳青凝黛波萍綠撥醅居易春

榆初改火律管又飛灰紅藥多遲發碧松宜亂栽禹錫

馬嘶馳陌上鷁泛鳳城隈色色時堪借夢夢病莫推度

涸流尋軋軋餘刃轉恢恢從此知心伏無因敢自媒禹

錫室隨親客入席許舊寮陪逸興嵇將阮交情陳與雷

此二句屬夢得也

居易洪爐思哲匠大厦要羣材他日登龍路應知

免曝顛禹錫

秋霖即事聯句三十韻

蕭索窮秋月蒼茫苦雨天泄雲生棟上行潦入庭前

居易送上

僕射苔色侵三徑波聲想五絃井蛙爭入戶轍鮒亂歸泉

起送上中承太監

高響愁晨坐空階警夜眠鶴鳴猶未已蟻穴亦

頻遷

禹錫送上少傅侍郎

散漫疎還密空濛斷復連竹霑青玉潤荷

滴白珠圓居易地溼灰蛾滅池添水馬憐有苗霑霖

無月弄潺湲起籬菊潛開秀園蔬已罷鮮斷行隨雁翅

孤嘯聳鳶肩禹錫橋柱黏黃菌牆衣點綠錢草荒行藥



路沙泛釣魚船居易長者車猶阻高人榻且懸此思劉台金

鳥何日見玉爵幾時傳起近井桐先落當檐石欲穿趨

風誠有戀披霧邈無緣禹錫以答懸懸之召廩米陳生醜庖薪溼起

煙鳴雞潛報曉急景暗彫年居易蓋灑高松上絲絲細

柳邊拂叢時起蝶隨葉乍驚蟬起巾角皆爭墊蓆裾別

似湔人多蒙翠被馬盡著連乾禹錫好客無來者貧家

但悄然溼泥印鶴迹漏壁絡蝸涎蚊聚雷侵室鷗翻浪

滿川上樓愁幕幕繞舍厭濺濺起律候今秋矣歡娛久

曠焉但令高興在晴後奉周旋禹錫

喜晴聯句

苦雨晴何喜喜多於雨時氣收雲物變聲樂鳥鳥知居易

射僕蕙泛光風圃蘭開皎月池千峰分遠近九陌好追隨送上

起送上尚書白日開天路玄陰卷地維餘清在林薄新照入漣

漪禹錫碧樹涼先落青蕪溼更滋曬毛經浴鶴曳尾出

泥龜居易舞去商羊速飛來野馬遲柱邊無潤礎臺上

有游絲起橋淨行塵息堤長禁柳垂宮城開睥睨觀闕

麗罽愚禹錫洛水澄清鎮嵩煙展翠帷梁成虹乍見市

散蜃初移居易藉草風猶暖攀條露已晞屋穿添碧瓦

牆鼓召金鐘起迴徹來雙目昏煩去四支霞文晚煥爛

星影夕參差禹錫爽助門庭肅寒摧草木衰黃乾向陽

菊紅洗得霜黎居易假蓋閒誰惜彈絃燥更悲散蹄良

馬穩炙背野人宜起洞戶晨暉入空庭宿霧披推林出

書目傾笥上衣梳禹錫道路行非阻軒車望可期無辭

訪圭竇且願見瓊枝居易山閣蓬萊客古以秘書喻蓬萊儲宮羽翼



師此言少傳每優陪麗句何暇覲英姿起以酬圭實之言翫景方搔首懷人尚斂眉因吟仲文什高興盡於斯禹錫

會昌春連宴即事

元年寒食日上已暮春天雞黍三家會鶯花二節連居易光風初澹蕩美景漸暄妍簪組蘭亭上車輿曲水邊禹錫松聲添奏樂草色助鋪筵雀舫宜閒泛螺杯任漫傳起園蔬香帶露廚柳暗藏煙麗句輕珠玉清談勝管絃居易陌喧金距鬪樹動綵繩懸姹女妝梳豔遊童衣服鮮禹錫圃香知種蕙池暖憶開蓮怪石雲疑觸天桃火欲然起正歡唯恐散雖醉未思眠嘯傲人間世追隨地上仙居易燕來雙涎涎雁去累翩翩行樂真吾事尋芳獨我先禹錫滯周慙太史太史公留滯周南今榮示慙古人矣入洛繼先賢此言

劉白聲價與二陸爭長矣

昔恨多分手今歡謬比肩起病猶陪讌飲老更奉周旋望重青雲客情深白首年居易徧嘗珍饌後許入畫堂前舞袖翻紅炬歌鬢插寶蟬禹錫斷金多感激倚玉貴遷延說史吞顏注論詩笑鄭箋起松筠寒不變膠漆冷彌堅興伴王尋戴謂隨僕射過尚書也榮同隗在燕居易自謂擲盧誇使氣刻燭鬪成篇實藝皆三捷虛名媿六聯禹錫興闌猶舉白話靜每思亥更記歸時好亭亭月正圓起

僕射王起來示有三春向晚四者難并之說誠哉

是言輒引起題重為聯句疲兵再戰勅敵難降

下筆之時嘖然自哂走呈僕射兼簡尚書劉禹錫

三春今向晚四者昔難并借問低眉坐何如攜手行居易舊遊多過隙新宴且尋盟鸚鵡林須樂麒麟閣未成



起分陰當愛惜遲景好逢迎林野熏風起樓臺穀雨晴  
 禹錫牆低山半出池廣水初平橋轉長虹曲舟回小鷁  
 輕居易殘花猶布繡密竹自聞笙欲過芳菲節難忘宴  
 慰情起月輪行似箭時物始如傾見雁隨兄去聽鶯求  
 友聲禹錫蕙長書帶展菰嫩剪刀生坐密衣裳煖堂虛  
 絲管清居易峰巒侵碧落草木近朱明與點非沂水陪  
 膺是洛城白為三川守故云起撥醅爭綠醕臥酪侍朱櫻幾處能畱  
 客何人喚解醒禹錫舊儀尊右相新命寵春卿有喜鵲  
 頻語無機鷗不驚居易青林思小隱白雪仰芳名訪舊  
 殊千里登高賴九城起鄴侯司管鑰疏傅傲簪纓綸綍  
 曾同掌煙霄即上征禹錫冊庭嘗接武書殿忝連衡蘭  
 室春彌馥松心晚更貞居易琴招翠羽下鈎掣紫鱗呈

只願回烏景誰能避兕觥居易方知醉兀兀應是走營  
 營鳳閣鸞臺路從他年少爭居易更呈二公

樂天是月長齋鄙夫此時愁臥里閭非遠雲霧  
 難披因以寄懷遂為聯句所期解悶焉敢驚禪



五月長齋月文心苦行心蘭蔥不入戶蒼筍自成林夢  
 得護戒先辭酒嫌喧亦徹琴塵埃賓位靜香火道場深  
 樂天我靜馴狂象餐餘施衆禽定知於佛佞豈復向書  
 淫夢得闡藥凋紅豔庭槐換綠陰風光徒滿目雲霧未  
 披襟樂天樹為清涼倚池因盥漱臨蘋芳遭燕拂蓮圻  
 待蠶尋夢得舍下環流水窓中列遠岑苔斑錢剝落石  
 怪玉欽岑樂天鵲頂迎秋禿鶯喉入夏瘖綠楊垂嫩色  
 縱棘露長鍼夢得散秩身猶幸趨朝力不任官將方共




拙年與病交侵樂天徇樂非時選忘機似陸沈鑒容稱  
 四皓捫腹有三壬夢得攜手慙連璧同心許斷金紫芝  
 雖繼唱前後各在賓客白雪少知音樂天憶罷吳門守相逢楚水  
 尋舟中頻曲宴夜後各加斟夢得濁酒銷殘漏絃聲間  
 遠砧醜顏舞長袖密坐接華簪樂天持論峰巒峻戰文  
 矛戟森笑言誠莫逆造次必相箴夢得往事應如昨餘  
 歡迄至今迎君常倒屣訪我輒攜衾樂天陰魄初離畢  
 將有雨陽光正在參五月之節待公休一食縱飲共狂吟夢得

白香山詩集補遺卷下









110X  
503  
10